


# *AYAW PAGSALIG SA IMONG KAUGALINGONG SALABUTAN*

 Magpabilin kita sa pagtindog, sa makadiyut lang karon, alang sa pag-ampo. Pila man ang ania dinhi nga adunay paghangyo sa ilang kasingkasing, nga buot ninyo ang Dios mobuhat ug pinasahi nga butang alang kaninyo niining konbensyon? Atong iduko ang atong mga ulo karon ngadto Kaniya.

<sup>2</sup> Langitnong Amahan, usa kami ka katawhang hinatagan sa katungud nga mapaghiusa dinhi sa Ngalan ni Ginoong Jesus, sa usa ka gawasnong nasud diin kami makasimba Kanimo sumala sa mando sa among konsensiya, sama karon. Ug nagaampo kami, Amahan, nga kini magdugay pa. Ug karon hinaut nga among mapahimuslan kining dakung katungud nga ania kanamo. Ug hinaut nga among ipahiluna ang tibuok namong kasingkasing sa maong bulohaton niining gabhiona, sa pagsimba Kanimo, nga kini mahimong pagaingnon, nga, “Ang Dios ania sa among taliwala ning gabhiona, nagapanalangin sa Iyang katawhan.” Luwasa ang matag nangawalang kalag nga ania niining gabhiona, Ginoo. Ug ang matag-usa nga namalik sa pagpakasala, hinaut nga mobalik sila ngadto sa balay sa Dios. Nagapangaliya ako sa matag tawong masakiton, nga hinaut mangaayo, ang balati-anon hinaut nga makalakaw, ug ang buta makakita, ang bungol makadungog, ang pagdayeg ug himaya igahatag ngadto kang Jesus Cristo taliwala sa Iyang katawhan. Hinaut nga kini mahinumduman sa hataas nga panahon, Ginoo, tungud nga nagkatigum kami sa among mga kaugalingon ug nangayo sa Ngalan ni Jesus alang niining mga panalangin. Amen.

Makalingkod na.

<sup>3</sup> Bisan pa, sa pag-anhi sa Ramada Inn, sa kanunay mora’g usa ka pagpauli kini sa puloy-anan, daw sa, tungod kay dinhi na ako pirme sukad pa hangtud sa akong—akong pagtoo nga ila na ako kinahanglan sugdan sa pag-ila. Ug ako malipayon niana, tungud kay akong napalgan ang usa ka maayong pundok sa mga tawo nga ania niining Ramada Inn. Ang usa sa Tucson ug ang usa dinhi, sila sukad pa maayo kaayo kanato, ginatugotan kita nga magkaadunay mga bulohaton. Dili pa dugay kaniadto, ako adunay mismong bulohaton, didto sa Ramada Inn, ug ang tagdumala dili gani ako pabayron sa abangan sa gitiguman. Maayo kini kaayo. Akong mahinumduman nga sa akong pagpanglatas sa mga nasud, usab, karon, kadto mao ang mga maayo ngadto sa animalay sa Dios.

4 Karon nagkaaduna kita’y, sukad pa sa Dominggo sa gabii, o sa Dominggo sa hapon, diay, pipila ka mga maanindot nga mga panahon diha sa Ginoo, o maayo na lang nga adunay ako. Nagkaaduna ko’y usa ka maanindot nga higayon sa pagkalipay sa Iyang mga panalangin, ug sa pagpakig-ambitay sa Espiritu Santo ug uban sa Iyang katawhan.

5 Buot kong—kong hinumduman, nga, nagakahiya kita nga nagasimba sa Dios. Ikaw usa ka kinaiya sa Dios, kabahin sa Dios, sa dihang nahimo kang anak nga lalaki ug anak nga babaye sa Dios. Ug ang Dios anaa kanimo, ginabuot ang Iyang kabubut-on, kon imo Siyang tugotan sa pagbuhat niini.

6 Busa kita nagalaum, niining gabhiona, nga ang matag tawo hikalimtan na ang mahitungod sa mga butang sa miaging mga adlaw, ug ginapahiluna ang tanan sa daplin, ug ipahimutang lang ang atong mga kasingkasing ngadto mismo sa bulohaton karon; dili lang nganhi niining gabhiona, kondili sa umaabot nga konbensyon. Sa wala’y pagduha-duha daghang mga pinadala ang nagkatigum. Akong makita ang pipila sa mga nadugang niining gabhiona diha sa entablado, nagakatigum alang sa konbensyon nga nagasugod ugma. Ug akong ginahangyo ang mga tawo nga ania dinhi alang sa rebaybal nga aduna kita bag-ohay pa, nga, kon mahimo man lang, buot ko nga magapabilin kamo alang sa konbensyon. Ania’y atong nalista nga mga maayong manunulti. Ang usa ka igsoon dili makaanhi, ug, apan adunay atong daghang ikahulip sa iyang dapit. Buot kong maania sa tibuok konbensyon ako mismo, aron mapahimuslan kining panagkatipon.

7 Nahibalo mo, nagatindog kita dinhi ingon nga mga ministro, ug kita nagasulti, ug atong kanunay ginahatag ngadto sa katawhan ang tanang butang nga ania kanato. Nagwali ako ug usa ka hilisgutan sa usa ka higayon, diin miingon si Jesus, “Tan-awa ang lirio, kon unsa sila nga wala ni—ni magbudlay o magkalinyas man, ug ngani suginlan Ko kamo nga si Solomon sa tibuok niyang katahuman wala gani makabisti maingon sa usa niini.” Ug akong nakaplagaan, ang lirio kinahanglan motubo, sa adlaw ug gabii, magkalinyas, maghago, ug aron paghimo sa iyang kaugalingon nga masilakon. Apan wala kini nagakuha’g panalangin gikan niini, sa iyang kaugalingon. Iyang ginabukhad ang iyang kaugalingon, ug—ug ang lumalabay ginapanimahuan ang kahumot gikan kaniya. Ang buyog nagakuha ug dugos gikan mismo sa maong kinasuluran. Iyang ginahatag ang tanan nga iyang ginahaguan aron kuhaon. Ug akong ginahinganlan ang akong mensahe, *Ang Reverendong Mister Lirio*, nga daw usa ka talagsa-on nga teksto.

8 Apan—apan kini mao gayud, ang mga ministro ginahatag ang ilang kaugalingon ngadto sa maong mga tawo, ug unya maayo nga molingkud na lang ug—ug maminaw sa uban. Sama sa pagpainit pinaagi sa kalayo, gusto natong molingkod

ilalum sa siga sa kalayo sa usa'g-usa ug painitan ang atong kasingkasing uban sa Maayong Balita nga ginawali sa atong mga kaigsoonan ngadto sa mga tawo. Ug mapasalamaton ako nga nakaangkon niining kahigayonan sa pagbuhat niana. Ug karon nagasalig ako niining gabhiona . . .

<sup>9</sup> Gisultihan ako ni Billy nga nagpanghatag siya ug mga kard alang sa pagpaampo, ang tanan gayud. Ug dili kita makahimo ug linya sa pagpangampo dinhing dapita kon kinahanglan nato. Kita n'yo, kinahanglan mo pa nga mogawas agi didto, ug latas sa mangitngit nga alagian, ug moabot niining dapita. Mahidagma pa mo sa kon unsa nga mga butang, aron makaabot dinhi. Ug ang mga nanag-antus ug bakul mahiadto pa sa di-maayong kahintang, sa pagbuhat niini.

<sup>10</sup> Apan wala kita mahibalo kon unsa tingali buhaton sa atong Ginoo. Mahimong mokunsad Siya mismo dinhi kanato, niining gabhiona, ug—ug ayohon ang matag-usa nga ania dinhi, ang matag balatian. Oh, palabihon ko pang makita kana kaysa tanang mga linya sa pagpangampo nga ako nagkaaduna gayud sa akong kinabuhi, aron—aron lang nga makita ang labaw'ng kagamhanan sa Dios nga nagakunsad taliwala sa Iyang masinugtanong mga anak. Ako—akong gusto kana sa kanunay.

<sup>11</sup> Ang kasagaran, kong aduna man ka'y kinaugalingong pagpakigduol sa mga tawo, sama sa pagpamandong sa mga kamot, mamahimo kini, wala ako magtoo nga daghan kaayo ang mobuhat niana, bueno, moingon sila, "Usa ka—usa ka ministro mipandong sa iyang mga kamot kanako, ug, himaya sa Dios!" Nagapahimo kana sa mga tawo sa paglantaw nianang ministro dayon.

<sup>12</sup> Apan kon makatindog ka lamang dinhi, iwali ang Pulong, ug tugotan ang Espiritu Santo sa pag-ayo sa matag-usa, nan diha sa wala'y duhaduha kini mao lang ang grasya sa Dios. Ug dayon maangkon sa Dios ang tanang pagdayeg, himaya. Wala na'y ni usa ka anino alang ni kinsa pa man. Ingon niana ako, sa akong pagpamuhat, ang hinungdan nga dili ko maatiman ang daghan kaayo, gawas lamang. . . Karon, kagabii, atong gisulayan sa pagpangampo alang ngadto sa ingon kadaghan kutob sa atong mahimo. Apan ang pagpamandong sa mga kamot . . .

<sup>13</sup> Kasagaran niini sa mga gabii, tingali gayud ang Espiritu Santo moabot sa taliwala kanato ug magapadayag sa Iyang Kaugalingon, nagapaila sa Iyang Kaugalingon sa atong taliwala. Ug unya pinaagi niana, ako nagtoo, kini tinuod, sa dihang mahimo Niya diha sa labaw'ng pagkagamhanan, kita n'yo. Dili ko mahimo ang pag-ingon karon, "Kining tawhana, o *kining* babayhana, o *kanang* bataa," kita n'yo. Ang Espiritu Santo nagalihok sa tigumanan ug nagasulti ngadto kang bisan kinsa nga Iyang sultihan. Kita n'yo, mao kana ang pagkamakagagahum. Ug dayon kana mao ang nagadala sa kahibalo, tungod kay usa kini ka saad sa Dios, ug kana ang

nagadala sa kahibalo sa Dios nga makagagahum, ug nagadala usab sa Iyang Presensya dinhi kanato. Ato kinahanglan makita kini ug magkalipay! Ug bisan pa kon . . .

<sup>14</sup> Moingon ka, “Bueno, piang ako kaniadto sa akong kamot. Didto ako sa miaging gabii. Wala ako—ako—ako maayo bisa’g gamay.” Wala kana bisan unsay kalambigitan bahin niini. Alang kanimo, kini nahuman na. Wala ka nagatan-aw sa imong kamot kon ingon-ana, imong ginatan-aw ang saad, nakita mo. Ug busa, dili ka makaingon, “Bueno, si Igsoong *kini-ug-kana* wala giampo ang pag-ampo sa pagtoo, o ingon niini ug niana.” Ang Presensya niini sa Ginoo ang naghatag kanimo sa pagtoo, nakita mo, ug dayon Iyang gipadala ang Iyang Pulong ug giayo sila.

<sup>15</sup> Karon, kagabii akong—akong gipakyas na usab ang akong saad. Akong siguradohong sulayan ang pagtuman niini karong gabii, kon mahimo ko. Ug karon adunay usa nga miingon, “Wala ka mipabilin sa imong teksto kagabii.” Wala, wala ako—ako; tungud kay, sultihan ko kamo kon ngano. Akong iwali kadto ang usa ka hilisgutan, karon nahikalimtan ko kon unsa gayud, *Apan Ang Dios Nga Madagayaon Sa Kalooy*.

<sup>16</sup> Ug napaningkamutan kong isaysay kung giunsa nga si Pablo, sa pagsulti didto, nag-ingon, “Nga kita sa kaniadtong panahon,” sa usa niana ka panahon, sa ubang panahon kaysa karon, “mga patay pa kita, ug diha sa sala ug mga kalapasan; kinsa gibuhi sa Dios, nahimong buhi.” Karon, kita n’yo, sa dili pa ang bisan unsang butang nga mahimong buhion, kinahanglan adunay butang dinha nga mahimong buhion. Tinuod kana.

<sup>17</sup> Busa, nakita ninyo, kung ikaw atua na kaniadto pa sa kahibalo nang daan sa Dios, nan ikaw nahimo nang kabahin sa Dios. Ug ang bugtong paagi nga mahimo kang usa ka anak nga lalaki sa Dios o anak nga babaye sa Dios, kinahanglan nga kabahin ka sa Dios, ug dili mahimong kumpleto ang Dios kung wala ka. Kinahanglan nga ingon niini. Husto kana, kay aduna ray Usa, ang usa ra ka tinubdan sa Kinabuhing Wala’y Katapusan, ug kana mao ang Dios, ug diha lamang Kaniya ang Kinabuhing Wala’y Katapusan. Kita n’yo? Karon, ug kamo kaniadto kabahin na Kaniya, sa ingon nga kamo kinaiya, o diha na sa Iyang hunahuna sa sinugdanan pa. Ug, niana, tungud kay gihunahuna ka na Niya sa sinugdanan, kini nagahatag ug gamay’ng pagbira paingon Kaniya. Mao kana kon unsa ang kinahanglan nga mahimong buhi-on. Ang uban kanila dili gayud mahimong buhi-on; wala lang gayud sila niini, mao lang kana.

<sup>18</sup> Sama lang sa kon ibutang mo ang usa ka liso sa mais sa yuta, wala’y . . . Bisan kon unsa pa katahum kini, kon kini wala’y semilya sa kinabuhi niini, dili gayud kini mahimong buhion. Apan ang semilya sa kinabuhi kinahanglan nga anaa una kini diha.

19 Ug adunay akong gamay'ng sugilanon mahitungod nianang agila, nga nagalakaw uban sa mga inayang manok ug mga manok tungod kay siya nاپسو ug nahimugso didto, apan wala gayud siya mibati sama nilang mga manok. Ug, nahibalo mo, sa dihang ang iyang inahan miagi ug misinggit, nakadungog siya'g tingog nga maayo kaayo paminawon alang kaniya, tungod kay, hinumdumi, usa siya ka agila, sa sugod pa lang. Kinahanglan lang niya mahikaplagan ang iyang kaugalingon, aron mahikaplagan ang iyang dapit.

20 Ingon niana ang matag magtotoo. Wala ka matawo alang niining maong kalibutana. Gibuhat ka diha sa dagway sa Dios, aron mahimong anak sa Dios. Ug dili ka nahisakop niining nataran sa mga manok dinhi. Usa ka ka Agila.

21 Ug nahibalo mo, nakasakay ako nianang “agila” ug dili na nako mauli ug akong tiil diha sa yuta, busa igo ko na lang. . . Mipadayon ko ug dugay kaayo, ug dayon nahikalimtan ko kung unsa na ang akong tekstos, ug nawala ang akong mga sinulat ug ang tanan pa. Aduna ako'y usa ka dili-maayong higayon kaniadto. Apan ingon niana kadto, kadto lang kini tungod niadtong “agila.”

22 Karon hinaut nga kanang Agila, ang Dios! Nahibalo mo, ginapahisama sa Dios ang Iyang mga propeta sa mga agila. Ug Iyang ginatawag ang Iyang Kaugalingon nga agila; Siya mao ang Jehovah nga Agila, ang Amahan nga Agila.

23 Ug ang hinungdan nga ginabuhat Niya kana, ang usa ka agila makahimo sa paglupad sa mas mahabog pa kaysa uban pang mga langgam, ug tungod nga gibuhat siya nga lahi kay sa uban nga langgam. Karon, wala niya ginabuhat ang iyang salag diha sa yuta sama sa mga manok ug sa uban pa, kondili nagaadto siya sa hataas aron buhaton ang iyang salag.

24 Ug ang usa pa ka butang, nga, usa siya ka pinasahing binuhat nga langgam. Karon kon ang usa ka—usa ka banog, o usa ka uwak, o usa ka manaol, o bisan unsa pang langgam mosulay sa pagsunod kaniya padulong ngadto sa kalangitan, mabungkag gayud siya; wala siya buhata alang niini. Kinahanglan mamahimo siyang, usa ka pinasahing persona aron nga makaadto didto. Ang iyang mga balhibo mas lig-on kaysa uban pa nga mga langgam.

25 Ug—ug ang iyang mata mas mahait pa kaysa uban pa nga mga langgam. Ug sa diha nga siya nagapahitaas pa, mas halayo pa ang iyang matan-aw. Bueno, ang uban kanila nga mga langgam, kung mahiadto na sila sa ingon kataas nga mao'y ilang maabot, sila ingon na kabuta sama sa kabog. Ug ingon niana ang uban sa . . . Bueno, kon ilang biyaan kanang kredos, nan wala na'y ilang hibangkaagan bahin Niini. “Ang mga adlaw sa mga milagro milabay na,” ngano man? Dili man nila makita Kini.

26 Apan ang mga agila makaabot ngadto sa kalangitan, ug sa mga kalangitan sa Langit didto sa hitaas. Unsa may nakaayo sa pag-adto Didto kung dili man ka makakita? Oh, malipayon kaayo ako nga nahimong usa kanila, ug mikuyog uban sa tibuok salag kanila karon.

27 Atong ablihan ang Daang Tugon, ngadto sa Libro Sa Mga Proverbio, nga sinulat ni Solomon, ang usa sa labing manggialamong tawo sa kalibutan, gawas sa atong Ginoong Jesus. Apan dili gayud Siya sama kang Solomon, maingon nga si Solomon usa ka tawong natawo sa usa ka babaye ug gipanganak pinaagi sa usa ka yutan-ong amahan, si David. Apan si Jesus usa ka Anak nga natawo sa ulay, ug dili sa bug-os usa ka tawo; apan Siya Dios, ang maong Dios nga Tawo, ug labaw pa Siya sa tawo, usa Siya ka tawo, ug labaw pa. Kita n'yo? Apan si Solomon tawo lamang nga sama kanimo ug kanako, ug iyang gihangyo ang Dios alang sa kaalam, aron sa pagdumala sa iyang gingharian. Ug aduna siya'y hiyas sa kaalam, ang labing maalamon nga tawo nga ato gayud nahibaloan gawas sa atong Ginoo. Iyang sinulat ang Mga Proverbio, ug sa akong panghunahuna maayo kaayo sila.

28 Ug ato nang ablihan karon sa Libro Sa Mga Proverbio, sa ika-1 nga kapitulo, ug, o sa ika-2 nga kapitulo, diay, ug ang unang pipila ka mga bersikulo sa Mga Proverbio, sa 2, sugod sa 1. Mga Proverbio 2, sugod sa 1, ang pagpadayon ni Solomon nga nagapanambag sa iyang mga anak nga lalaki, "Anak ko, kung imong pagadawaton. . ." Pasayloa ko.

29 Kini sa Mga Proverbio 3:1. Pasayloa ko. Akong gitan-aw dinhi sa—dinhi sa akong libro, ug akong nakita nga kini sa Mga Proverbio 3 inay nga 1 o 2. Pasayloa ko. Mga Proverbio 3:1.

*Anak ko, ayaw hikalimti ang akong kasugoan; Apan pabantayi sa imong kasingkasing ang akong mga sugo:*

*Kay ang kadugayon sa mga adlaw, ug mga tuig sa kinabuhi, ug pakigdait, mamahimong iga. . .sila igadugang kanimo.*

*Ayaw pagpabiyaa kanimo ang kalolot ug kamatuoran: ihigot mo sila sa imong liog; isulat mo sila sa ibabaw sa mga papan sa imong kasingkasing:*

*Aron ikaw maka kaplag sa kalomo ug maayong salabutan sa atubangan sa Dios ug sa tawo.*

*Sumalig ka sa GINOO sa bug-os mong kasingkasing; ug ayaw pagsalig sa imong kaugalingong salabutan.*

*Sa tanan nimong mga dalan ilha siya, ug siya magamando sa imong alagianan.*

30 Oh, sa akong hunahuna mao kana'y labing matahum nga Kasulatan! Karon buot kong kuhaon alang sa usa ka teksto,

gikan sa—sa ika-5 nga bersikulo, *Ayaw Pagsalig Sa Imong Kaugalingong Salabutan*.

<sup>31</sup> Karon kini mao'y usa—usa ka talagsaong teksto alang sa maong adlaw nga atong ginapuy-an, tungud kay ang pagpasulabi karon mao'y siguradong napahimutang diha sa edukasyon ug diha sa atong kaugalingong pagpanabot sa mga butang, ang maong adlaw sa—sa pagkakatat-on. Apan atong makita dinhi nga kining talagsaong pamahayag, sama sa ubang Kasulatan, anaay iyang dapit, ug kita nagasalig nga igapakita kanato sa Dios kung hain ang maong dapit.

<sup>32</sup> Karon atong ginapadala ang atong mga anak sa tulonghaan, aron makabaton ug salabutan. Dayon human na nga sila makaagi sa pang-gramatika nga mga tulonghaan, ato silang ginapadala sa hayskul alang sa mas maayong pagsabot sa kaalam. Dayon sa pagkahuman na nila didto, ang uban sa mga bata igo pang mapalaron gani nga makaadto sa kolehiyo, ug agihan ang kolehiyo aron humanon ang ilang edukasyon ug ang ilang pagpanabot sa kahibalo. Kon unsay ilang nabatunan pinaagi sa...Sa makadaghang higayon, aron makakita ug trabaho, kinahanglan aduna kay bisa'g sa labing ubos usa ka pang-hayskul nga salabutan, o usa ka pang-kolehiyo nga edukasyon, o uban pa.

<sup>33</sup> Apan, ang maalamon nga si Solomon nag-ingon kanato nga, “ayaw pagsalig diha niini, dili ngadto sa atong kaugalingong salabutan; ayaw kat-oni kining mga butanga.” Tungod kay mahibulong kita kung nganong mosulti man siya sa ingon nga sama niini, kay kini tungud nga sa kasagaran ang atong modernong salabutan kasagaran mao ang kaalam sa tawo, nga supak sa Pulong sa Dios. Sa pagtoo ko mao kana kon unsa ang gipanguhaan pagtambag ni Solomon sa iyang mga anak nga lalaki, dili aron nga mahimong wala'y alamag, kondili nga dili magsalig ngadto sa ilang salabutan.

<sup>34</sup> Ug nagtoo ko nga usa kini ka maayong pahamatngon karon, kon kita miingon sa atong mga anak ug sa mga anak sa Dios, nga, maayo man ang pagbaton ug edukasyon, wala'y bisan unsang batok niana; apan kon kanang maong edukasyon sukwahi na sa Pulong sa Dios, nan pagsalig sa Pulong ug pasagding mawala ang imong edukasyon, kita n'yo, tungod, sa Pulong. Ug ang edukasyon magabarug ug magahatag kanimo sa maayong trabaho, tingali'g maayong pamarug taliwala sa mga salabutanong mga tawo, apan, maayo man kana, nga tingali mamahimong dakung tabang kanimo, magatabang kanimo sa imong mga panalapi ug sa imong—imong panginabuhi, himoon tingali ang pagpanginabuhi ug mas maayong diyutay alang kanimo.

<sup>35</sup> Apan hinumdumi ang usa ka butang, anak ko, mamatay ka gayud. Bisa'g pila pa ang imong naangkon nga edukasyon, bisa'g pila pa ang imong nakat-onan nga imong natigum, kinahanglan

mo sa gihapon atubangon ang kamatayon, tungud kay nahisulat na kini, nga, “Ang mga tawo mamatay gayud, ug human niana mao ang Paghukom.” Ug ang Dios, sa dihang . . . Dili man kaayo dautan ang kamatayon, apan ang pag-adto sa Paghukom mao ang dautang bahin. Karon, mahimo kang mamatay, “apan human niana mao ang Paghukom.” Ug ang Dios dili mangutana kanimo kung unsa ka daghan ang imong naeskwelahan sa dihang dinhi ka pa sa kalibutan, kon unsa ka daghang kahibalo ang imong natigum, kon nakaangkon ka man sa imong Bachelor of Art, o bisa’g unsa pa man nga hut-ong ang imong naagihan, bisan pa ingon nga ministro. Dili kini mao’y panil-ngon kanimo.

<sup>36</sup> Apan kini mao ang panil-ngon, kanimo, kon unsa ang imong gibuhat mahitungod sa pagsabot sa Pulong sa Dios. Diha nagagikan ang mga pagpaningil, tungod sa Niana. Ang imong edukasyon maayo man, apan ang Pulong sa Dios mao ang Kinabuhi. “Ang Akong Pulong Kinabuhi,” ug ang pag-ila Niini mao’y Kinabuhi. Ug Siya, Siya miingon, “Ilha Siya.” Siya mao ang Pulong. Busa mailhan mo lamang Siya pinaagi sa Pulong, kay Siya mao ang Pulong. Mao lamang kana ang paagi nga makaila ka Kaniya, mao’y pinaagi sa Iyang Pulong.

<sup>37</sup> May makahimo sa pag-anhi ug moingon, “*kini* mao ang Dios,” o “*kana* ang Dios,” o “*kini* ang Dios,” o “*husto kini*,” ug “*husto kana*,” apan nagabalik kita sa Pulong, nga mao ang Kamatuoran.

<sup>38</sup> Ug ang Pulong sama lang sa—sa Amihanang bitoon, usa kini ka matuod nga bitoon. Bisan pa kon diin nga padulnganan ang kalibutan nagalutaw, kanang Amihanang bitoon nakasentro sa kalibutan. Imong ipahimutang ang imong kompas ngadto sa Amihanang bitoon. Kanunay kining anaa sa sentro sa kalibutan. Ang ubang mga bitoon nagalutaw libot uban sa kalibutan, apan ang Amihanang bitoon nagapabiling wala nagabalhin.

<sup>39</sup> Karon ang kompas mao ang Balaang Espiritu, ug (ang) imong—imong huktanan mao ang Amihanang Bitoon, busa ang Balaang Espiritu kanunay gayud nagatudlo ngadto sa Pulong. Ang Balaang Espiritu dili gayud magapanguna kanimo ngadto sa bisan unsa pang butang kondili sa Pulong sa Dios. Busa unsaon man madawat sa tawo ang kredo, kon supak kini sa Pulong, ug unya sa gihapon nagaingon nga aduna siya’y Espiritu Santo? Ang Espiritu Santo na’y motudlo kanimo sa pagpahilayo gikan niana. Gikinahanglan ang Balaang Espiritu aron motudlo kanimo ngadto sa Pulong, kay Siya mao ang Pulong. Siya mao ang Pulong, ug mahimo lang Niini. . . Sama sa—sama sa magnet diha sa kompas nga gipahimutang lang ngadto sa North Pole, mao lamang kana ang dulungan nga mahipatonung niini. Ug sa diha ang Balaang Espiritu mao ang Mag-uugmad ug Magsusulat, ug tagahatag-kinabuhi sa Pulong, unsaon man Niini pagpatunong sa tawo sa bisan unsa pang butang gawas sa Pulong?



40 Busa kon ang tawo nagaingon anaa sila’y Espiritu Santo, ug ginadawat ang butang nga supak sa Pulong, nagapakita kini nga dili tinu-od nga Espiritu Santo ang ilang naangkon. Kita n’yo? Tingali’g usa kini ka espiritu, dili ako makiglantugi niana, apan dili kini—dili kini ang Espiritu Santo ni Cristo. Karon, nahibalo kamo, sa makadaghang higayon, sila nagadinawatay ug mga espiritu sa usa’g-usa; ug sa ingon kana’y magatudlo ngadto, diha ingon sa pundok sa tawo, ngadto sa usa ka butang, apan dili kini—dili kini magatudlo ngadto kang Cristo. Apan ang Balaang Espiritu kanunay nagatudlo ngadto kang Cristo, ug si Cristo mao ang Pulong.

41 Atong makita kini nga tataw kaayo sa Biblia. O, makita ko. Tingali’g masayup ako, apan, sa akong panghunahuna, apan wala ako nagatoo sa ingon; tungod kay, niana, kini: “Ayaw pagsalig ngadto sa imong kaugalingong salabutan sa mga butang.” Kon nagasalig ka sa kaugalingon nimong salabutan, nan sigurado gayud kang mawala sa hustong dalan. Dili ka makasalig sa kang kinsa pa may salabutan, kon kini mahitungod na sa Kinabuhi. Aron makakaplag sa Kinabuhi, kinahanglan nga mosalig ka ngadto sa Pulong. Mao kana ang Kinabuhi.

42 Atong makita kini, gikan pa sa sinugdanan. Kini tinaw kaayo nga nahipadayag kanato, sukad pa sa sinugdan, nga gikahatag sa Dios ang Iyang Pulong sa Iyang nahaunang banay sa yuta, aron mabuhi pinaagi niini. Sa Iyang Pulong lamang, mao ang paagi nga mabuhi. Karon, dili kana pinaagi sa pagkaon ug kalan-on, ug uban pa. Apan pinaagi sa Iyang Pulong sila mabuhi, sa Wala’y katapusan. Ug samtang nga ilang gituman kanang Pulong, nagkinabuhi sila sa Wala’y katapusan. Apan ang unang diyutay’ng hugpong niadtong Pulong gihikling, ang tibuok kasumpayan nabugto, ug ang tibuok tawhanong kaliwat nahulog ngadto sa kamatayon. Kita n’yo, karon atong namatikdan.

43 Si Eva, kinsa sa wala’y pagduhaduha usa ka utokang persona; ang unang gikuha kang Adan, kinsa mao ang—ang anak sa Dios. Ug si Eva, maingon nga siguradong didto niadtong dapita diin sukad sa wala pa gayu’y sala, wala’y luna alang sa sala, siya sigurado aduna gayu’y maanindot nga panghunahuna kung unsa kaniadto ang Dios. Tungod kay, sa matag hapon, siya ug ang iyang bana misuroy sa maong kabugnaw sa tanaman, diha sa kagabhion, ug nakigsulti sa nawong ug nawong sa Dios. Daw sa unsa ka—ka dili makatarunganong butang nga ang usa ka tawo nga molakaw diha sa nawong ug nawong kauban sa Dios, sa matag adlaw, ug unya mosumbalik ngadto sa pagpangatarungan sa butang nga mao’y nakigpangatarungan kaniya pahilayo sa Pulong sa Dios!

44 Anaa gihapon na sila kanato. Sila madali kaayo sa gihapon mahipangatarungan pahilayo gikan sa Pulong sa Dios, human manglingkod sa Presensya sa Dios. Nga nakita na ang Pulong

sa Dios nga giwali, ang Pulong sa Dios nga nahipadayag, mga palahubog ug makasasala nga ningduol sa altar ug nangakabig ug nangahimo nga bag-ong mga binuhat diha kang Cristo, mga tawong buong ug kadungganang nangahimong mga maayong babaye ug mga maayong lalake; ug unya mamiya gikan nianang bulahanong Butang nga mao'y nag-agak kanila ngadto niining Kinabuhia, ug dayon mangabalit-ad pahilayo ngadto sa pipila ka matang sa kredo, aron mamahimo pang inila o—o mahiapil ngadto sa kon unsay ilang ginatawag nga mas maayong matang nga mga tawo.

<sup>45</sup> Aba, anaa na mo nianang pinakamaayong matang nga anaa dinha: mga anak nga lalake ug mga anak nga babaye sa Dios. Bueno, mas gusto ko nianang maong kahugpongong kaysa makauban ako sa mga hari ug mga gamhanan, ug sa tanang uban pa. Ihatag kanako nianang mapaubsanong pundok sa maong katawhan, kung wala man nila mahibalo-i ang ilang tung kamot gikan sa ilang wala! Basta kay nakaila sila sa Dios, ug nagahigugma Kaniya ug nagaalagad Kaniya, mao kana ang mga kadagkuan sa Langit, alang kanako. Oo, sir!

<sup>46</sup> Karon, apan atong makita nga si Eva dali ra nadani ni Satanas, gikan sa Pulong sa Dios, ug misalig siya sa iyang kaugalingong salabutan, tungod kay si Satanas naglaraw ug usa ka butang diha kaniya nga wala ngadto sa iyang tinu-od nga pagsabot sa Dios. Apan aduna siya'y uban pang butang nga gisulti ngadto kaniya sa kaaway, si Satanas, ug siya mitoo niini.

<sup>47</sup> Karon atong nakita ang mga gilungtaran niini. Kini nagpahagbong sa tibuok kaliwatan sa tawo ngadto sa kamatayon, tungod kay ang unang inahan sa yuta, misalig sa iyang kaugalingong salabutan, nga supak sa Pulong sa Dios, ug nagpahagbong sa tibuok kaliwatan sa tawo ngadto sa kamatayon. Karon nagatoo ba kamo niana? [Ang kongregasyon nagaingon, "Amen."—Ed.] Mao kana ang Pulong. Bueno, ang babaye kanunay mao'y. . .

<sup>48</sup> Ang Iglesia, sa Biblia, gitipo ngadto sa babaye. Ug ang iglesia karon makadawat ug hugpong sa mga dogma ug mga kredo, ug ibanlod ang tibuok kongregasyon diha sa usa ka panagbulag gikan sa Dios. Kadtong mga tawo nga nagasagup niadtong mga butanga, imbis sa Pulong sa Dios, managsama ra kang Eva. Ug kanunay na kining gibuhad usab ug usab, hangtud nga napabanlod niini ang tibuok kaliwatan pahilayo gikan sa Pulong sa Dios.

<sup>49</sup> Ug sa dihang nahipadayag na ang Pulong, ang Pulong gipadayag, dili nila Kini dawaton, tungod kay dili nila buhaton kini, tungod kay nagasalig sila ngadto sa ilang kaugalingong salabutan. "Kining iglesia natukod dinhi. Usa kini ka matahum nga dapit. Usa kini ka dakung organisasyon. Usa kini ka sakop sa usa ka dakung panon sa katawhan. Nganong dili man kita kinahanglan magpahisakop niana? Akong saligan kini." Ayaw

pagsalig sa imong kaugalingong salabutan, kondili pagsalig diha sa Pulong sa Ginoo!

<sup>50</sup> Karon—karon natapus kini, sa katapusan, sa kamatayon ngadto sa tibuok kaliwatan, sama sa ako nang giingon, sama sa gihapon karon, ngadto sa daghang mga tawo nga nagasalig sa ilang kaugalingong salabutan, sa ilang mga dogma ug mga kredo, ug sa uban pa, nga nanag-ingon, “Ang Pulong sa Dios dili tanan matuod, nga ang uban Niini dinihogan ug ang uban dili.” Unsaon man nimo pagbaton ug pagtoo sa Biblia, kon ang bahin Niini dinihogan ug ang uban niini dili? Kung ang usa, kon ang usa ka sinulat sayup, nan ang tibuok mahimo tingaling sayup. Kinahanglan husto gayud ang tanan, ensakto gayud.

<sup>51</sup> Ug ang uban niining mga gitawag, binalit-ad, mga tulonghaan sa Biblia nga nagatudlo sa kahibalo sa tawo, tiningub, diin sila nanagkatigum ug nanaglingkod sa usa ka konseho sa maong mga tawo, ug nagaingon, “Karon tan-awa, kon ang mga adlaw sa mga milagro, natapus na kini sa mga adlaw sa mga apostoles”. Ug daghang kalalaken-an nga nailalum sa maong obispo o sa maong labaw’ng mga tawo, molingkud didto ug moingon, “Bueno, kung mahiyuan lang ako uban kaniya, sa wala’y duhaduha apan tingali mahimong ako na ang sunod sa linya sa iyang katungdanan.” Kita n’yo, nan nagasalig ka na sa imong kaugalingong salabutan, inay nga nagabarug ka sa imong duha ka mga tiil alang sa Pulong sa Dios. Mao kana’y hinungdan niining mga butanga.

<sup>52</sup> Usa ka panahon kanhi, usa ka tawo . . . Atua pa ako sa usa ka pagpakiglantugi bahin sa bulohisan. Ug miingon sila kanako, matud pa, “Aba, bale wala ra man na ang imong mga piniyalan kondili mga tawotawo ra man, sa pagtoo ko.”

<sup>53</sup> Miingon ko, “Kung aduna ako’y piniyalan diha sa hunta, nga adunay laing panghunahuna, ug dili mobarug ug (dili ko igsapayan kung kinsa may nagasulti bahin niini) mopahayag sa iyang kaugalingong panglantaw niini, papahawaon ko siya sa hunta.” Oo, sir. Bisan pa kung supak kini sa akong tinoohan, gusto ko nga iyang ipahayag kung unsay iyang ginahunahuna nga maayo. Mao kana kon nganong gikuha ko siya alang didto, tan-awon kung unsa may iyang ikasulti bahin niini. Apan aduna kita niana.

<sup>54</sup> Matikdi, si Jesus miingon, diha sa Juan 10, “Ang Akong mga karnero nakaila sa Akong Tingog.” Ang Tingog, siyempre, mao ang Iyang Pulong, sa dihang Siya nagasulti. “Ang Akong carnero nakaila sa Akong Tingog. Ang Akong Tingog gipamatud-an na diha kanila, nga mao’y matuod. Napamatud-an na Kini nga kini mao ang Akong Tingog.” Karon, karon matikdi, dili sila nailalum sa pagsunod sa bisan unsa pang ubang tingog. Ayaw nila. “Ang Akong mga karnero nakaila sa Akong Tingog, ug sa lain nga magbalantay dili sila mosunod.” Sa laing pagkasulti, dili nila masabtan ang teolohikanhong tingog nga nagatudlo ug

supak sa Pulong. Ang karnero dili makasabot niana nga sama sa agila, sa miaging gabii, nga masabtan ang putak-putak sa himungaan. Dili sila makasabot niini, tungod kay agila man siya. Ug managsama ra kana sa usa ka tinuod nga natawo pag-usab nga anak sa Dios, ila ra masabtan ang mga butang nga iya sa Dios.

<sup>55</sup> Karon adunay moingon, “Bueno, tan-aw karon, makabuhat ka *niini*, sa akong pagtoo. Kini, nagatoo ako nga dili kini sa *niining* paagi. Nagatoo ako nga ang mga adlaw sa mga milagro nangagi na. Wala ako nagatoo nga Langitnong pagpang-ayo kana. Wala ako nagatoo Niini.” Karon ang usa ka matuod nga natawo pag-usab nga Cristohanon, dili gayud kana moundang sa iyang pangdungog, dili man lang niya masabtan kini. Ug unsaon man sa usa ka tawo nga nagatoo sa Dios, ug makamao mobasa sa Biblia ug makita nga Siya mao sa gihapon kagahapon, karon, ug hangtud sa kahangturan, modawat gayud sa ingon nianang butanga nga sama niana, dili ko masabtan kini.

Busa wala sila nagasalig sa ilang kaugalingong salabutan.

<sup>56</sup> Sama ra sa usa—usa ka masuso. Pagkuha ka ug usa ka gamay’ng masuso, ug tugoti siyang mahimugso ug tugoti siyang makapauraray makausa sa dughan sa iyang inahan, ipasuso kaniya, ang gatas nga mainit, ipauraray ang iyang gamay’ng ulo diha sa iyang dughan, bisan kon pipila pa lang siya ka mga oras ang kaguwangan. Sa sulod sa usa o duha ka adlaw gikan niana, kuhaa siya gikan sa iyang inahan ug ihatag siya ngadto sa suso sa laing inahan, iyang isikad ang iyang duha ka mga tiil paibabaw ug mosiyagit. Dili kana mao ang iyang inahan. Kita n’yo, anaa na’y iyang usa ka butang nga bahin kaniya, tungod kay kabahin siya niining maong inahan, sa gihapon ang kinaiyahan nagsangkap kaniya sa usa ka pamaagi aron makaila sa iyang kaugalingong mama.

<sup>57</sup> Ug kon ang kinaiyahan nanagsangkap alang sa masuso sa pag-ila sa iyang inahan, diin gikan niini siya natawo, unsa ka labaw pa kaniya nga usa ka anak sa Dios nga natawo pinaagi sa Espiritu sa Dios. Nakaila siya sa iyang Mama! Nakaila siya, tungod kay natawo man siya sa Pulong, ug nakasabot siya sa Pulong. Ibutang siya sa laing dapit, siguradong dili siya—dili siya mahimutang, mohawa siya dayon gikan didto sa dali nga kutob sa iyang mahimo. Tungod kay iya nang, wala siya nagasalig . . .

Adunay moingon, “Karon hulat sá, minahal, mao kini ang imong mama karon.”

<sup>58</sup> Dili kini mao ang iyang mama, tungod kay anaay iyang paagi sa pag-ila nga siya kabahin sa iyang inahan. Mao kana ang iyang inahan, wala na’y si bisan kinsa nga makahimo pagkuha sa iyang dapit. Nakaila siya sa iyang kaugalingong inahan. Matikdi, kung giunsa, kung giunsa nga ingon niini gayud. Ang Dios nagbuhat sa matag butang ingon sa iyang matang.

<sup>59</sup> Ang baka ingon sa ilang matang. Daghang higayon diha sa pagpangtingub sa mga baka didto, among dalhon ang tanang panon sa mga baka ug mga nating baka, kanunay ako matingala kung unsaon gayud nila pag-ila sa ilang kaugalingong mama. Karon, silang, sila nga nagagikan sa bukid, nagkasagol na tanan ang mga baka. Ang usa—usa—usa ka baka nga may kaubang nating baka, tingali'g ang gigutom na nga nating baka mototoy'g gamay gikan sa laing inahan, kung gigutom na siya kaayo; apan sa dihang amo na silang ginapahunong, didto sa sibsibanan, kanang maong inahan nagasugod na paglatas nianang panon sa mga baka ug mga nating baka hangtud nga iyang makita ang iyaha, ug ang maong nating baka nagadalagan na ngadto sa iyang inahan. Mailhan niini kanang gamay'ng pag-ingá ug ang iyang pagtiyabaw. Ug siya nagatiyabaw alang nianang nating baka, ug ang ubang mga inahan nangatiyabaw hangtud nga dili ka na gani makadungog sa imong kaugalingon nga nagahunahuna, apan kanang gamay'ng nating baka makamatngon nianang matuod nga tawag sa iyang inahan, tungod kay kabahin kini sa maong inahan.

<sup>60</sup> Ug ang usa ka natawo pag-usab nga Cristohanon gikan sa Langit, kabahin siya niining Pulong. Husto. Sa laing mama dili siya mosunod. Kabahin siya sa Pulong. Siya nagapabilin sa Pulong. “Kon ang trumpeta nagahatag sa dili tin-aw nga tingog, kinsa may mangandam sa iyang kaugalingon alang sa gubat?” matud ni Pablo. Nakaila siya sa tingog sa Pulong. Matikdi kon giunsa—kon giunsa niini, ang gitakda nang daan nga kamot sa Dios nga nagasunod kanila sa dayon. Nahibalo siyang gikatagana na siya, diha na siya sa Kamatuoran sa Maayong Balita. Nahibalo siya nga gipanganak na siya pinaagi sa Espiritu sa Dios. Nahibalo siya nga ang Espiritu sa Dios dili makahimo sa paglimod sa Pulong sa Dios, busa tungod niana sa laing magbalantay dili siya mosunod. Matikdi kon giunsa . . .

<sup>61</sup> Akong gisud-ong kining sinulat nga akong gisulat dinhi. Akong—ako nang gilabyan kini, apan nahitabo lang nga akong nakita ang balasahonong Kasulatan, nahunahunaan kong modangop ko'g balik niini pag-usab. Matikdi kung giunsa sa Iyang Kaugalingong pinili nang daan nga karnero sa pagsunod Kaniya, mismo sa mga adlaw sa mga pinakabantugang teologo nga nagkaaduna gayud kita. Nanggawas sila mismo, tungod kay nakaila sila Kaniya. Ilang nahibaloan kon unsa ang gisaad sa Pulong alang nianang maong adlaw. Nahibaloan nila sa kung unsa mamahimong susama ang Mesiyas sa dihang miabot na siya. Ug si Simon Pedro miduol ngadto Kaniya, nga mao si “Simon” pa lang kaniadto.

<sup>62</sup> Ug nasulayan na siyang suginlan ni Andres mahitungud niana. “Kining Tawhana mao ang Mesias.” Bueno, si Simon, siyempre, siya tingali'g medyo gahi'g ulo, ug dili siya moadto.

<sup>63</sup> Apan sa dihang milakaw siya ngadto sa Atubangan ni Jesus, sa pag-ingon ni Jesus, “Simon ang imong ngalan, ug anak ka ni Jonas.” Karon nahibalo kita nga gisultihan ni Jesus ang Iyang mga apostoles nga nakaila Siya kanila, ug kaniya, “Sa wala pa ang pagkatukod sa kalibutan.” Sila mao’y mga kinaiya na sa Iyang mga hunahuna. Busa, ingon nga kanang binhi napahimutang diha kaniya, ug nahibalo siya nga ang Pulong nag-ingon ug gisaad na nga ang Mesias mahimong usa ka propeta. Ug sa dihang nakita niya kana, tapus na ang iyang pagpangisda. Nahibalo siya dayon nga iya nang buhian ang iyang mga pukot, tungud kay siya moadto na—moadto na ug mahimo nang mangingisda ug mga tawo. Kay. . .

<sup>64</sup> Karon, adunay mga uban nga nagatindog didto, nga nakita ang samang butang nga gibuhay, ug giisip kini nga usa ka “dautang espiritu.” Mao kadto ang mga teologo, tungod kay wala man kadto sa urog sa ilang teolohikanhong pagpanudlo. Ug ilang gisalikway kini, tungod kay misalig sila sa ilang kaugalingong salabutan, pinaagi sa ilang mga doktor; sa dihang, si Jesus Cristo miabot diha sa katamanan sa Pulong sa saad, ug hilabihan sila kabuta aron nga makita kini. Misalig sila diha sa kung unsay giingon sa mga kaparian, ug diha sa kung unsay giingon sa iglesia, inay sa kung unsay giingon sa Dios.

<sup>65</sup> Karon gibadlong sila ni Jesus tungod niini. Matud Niya, “Susiha ang mga Kasulatan, kay diha Kanila nagaingon kamo nga kamo adunay Kinabuhing Dayon. Ug pinaagi Kanila Sila nagapamatuod Kanako. Niining maong mga Kasulatan nga Akong ginaingon kaninyo nga susihon, sila nagatug-an kaninyo kung kinsa Ako.”

<sup>66</sup> Apan dili sila mosalig sa kung unsay gisulti sa Pulong, apan misalig sila kung unsa na’y ilang pagsabot. Misalig sila ngadto sa ilang kaugalingong salabutan. Ug ang Kasulatan nagaingon kanato nga sila tinaptapan. Ang taptap sa ilang kaugalingong teolohiya mao’y nagpabuta kanila.

Moingon kamo, “Igsoong Branham, unsa may imong ginatumong?”

<sup>67</sup> Ako lang ginatumong kini. Nga kanang butanga nagakahitabo na usab, hangtud, ang mga kalalaken-an ug mga kababayen-an ug ang mga tawo mosalig na ngadto sa usa ka iglesia nga ilang gisudlan ug gipasakupan, bisan pa kon unsa may ginaingon sa Pulong sa Dios bahin niini. Mipadayon sila mismo diha niana, nanagsalig sa ilang kaugalingong salabutan, ug ginapaka-wala’y bili ang Pulong sa Dios, maingon nga mora’g wala Kini (sukad) bisan pa nahisulat. Mao kini ang wala-na-germitize nga binhi sa tawhanong kinabuhi. Nagbaton kini ug lawasnonng kinabuhi, apan wala’y espirituhanong kinabuhi niini aron nga kini mahimong buhion. Ang taptap nagatabon na sa ilang nawong.

68 Karon matikdi, sila adunay ilang kaugalingong panghunahuna kung unsa gayud ang Dios, sila anaay ilang kaugalingong pangaggas kung unsa gayud ang Mesias. Apan ang Pulong nag-ingon kon unsa gayud ang Mesias! Karon, kita n'yo, adunay ilang kaugalingong pagpanabot kung unsa gayud Siya. Sa wala'y duhaduha kondili sa kon unsay giingon sa labaw'ng pari, "Ang tanan kong mga pari nailalum kanako, karon kung moabot na ang Mesias. . . Nagtukod na kami ug usa ka dakung templo dinhi. Amo nang nabuhat kining tanan. Ug ang Biblia nag-ingon, 'Siya magaabot sa madali sa Iyang templo,' ug sa niining tanang mga butanga. Sa dihang buhaton na Niya, ang Mesias moanhi mismo dinhi ug magpaila sa Iyang Kaugalingon kanato, ug moingon, 'Ako mao ang Mesias. Miabot na ako. Ako mao kadtong Mesias nga sa una pa ninyong ginapaabot.'" Bueno, sa dihang miabot na gayud Siya, Siya miabot diha sa ingon nianang lahang pamaagi nga dili sama sa ilang gihunahuna niini kadto, wala nila Siya maila. Wala sila mahibalo kung Kinsa Siya kaniadto. Apan ang Iyang. . .

69 Oh, unsa kaha kung adunay usa ka tigpakaaron-ingnon nga miadto didto ug miingon, "Ako mao ang Mesias. Ako mao si Doktor *ingon niini-ug-ingon niana*"? Ila na untang gidawat kini.

70 Apan pagnahiadto ka na sa usa ka Tawo nga natawo sa usa ka katingad-ang pagkapanganak sa kaagi Niya, wala naedukar sa bisan unsang tulonghaan gayud nga Iyang naadtoan, aron makakat-on, wala'y ni seminaryo nga nagkaaduna Siya, wala'y kard alang sa pagpakigkauban; apan Siya mao ang hubad sa Pulong sa Dios, nga nadayag. "Ang mga buhat nga Akong ginabuhat, nagatug-an kaninyo kung Kinsa Ako. Kung dili Ko ginabuhat ang maong mga buhat nga gisaad na nga Akong pagabuhaton, nan ayaw pagtoo Kanako."

71 Ug dili ba nato kana maaplikar ngadto niining panahona? Sa dihang nagaabot ang Espiritu Santo, nga buot nilang iaplikar sa lain pang panahon, sa dihang nagaabot Siya diha sa pagpamuhat ug sa mga pagpasundayag sa Iyang gahum sa Kinabuhing Wala'y Katapusan, ang mga tawo buot tawgon kini ug usa—usa ka "binuang nga panatisismo." Ngano man? Nagasalig sila ngadto sa ilang kaugalingong salabutan, ug dili ngadto sa Pulong sa Ginoo. Nasayod kamong husto kana.

72 Ang maong timailhan, nga ang Dios, ang Kaugalingon Niyang pagkabatbat mao ang pagpadayag sa maong saad.

73 Tingali'g akong isulti kini, himoon kining mas tin-aw'ng diyutay. Sa dihang ginasulti sa Dios ang Pulong, wala Siya magkinahanglan ni bisan kinsang lalaki o bisan kinsang babaye, o wala'y si bisan kinsa pa, aron ingnon kung unsay ipasabot Niana. Sa dihang miingon Siya. . . Bueno, moingon ka, "Kini mao'y buot ipasabot sa Dios." Ang Dios maminatud-on gayud sa kung unsa may Iyang ginasulting buot Niyang ipasabot. Kita n'yo?

<sup>74</sup> Karon ginaunsa man Niya sa paghubad ang Iyang Kaugalingong Pulong? Pinaagi sa pagtuman Niini. Ang Biblia nag-ingon, “Ang usa ka ulay magasamkon,” nagsamkon gayud siya. Wala na kana magkinahanglan pa ug bisan unsang pagbatbat. Ang Dios nag-ingon, “Maanaay kahayag,” ug mitungha ang kahayag. Wala na kana magkinahanglan pa ug bisan unsang pagbatbat.

<sup>75</sup> Ang Dios nag-ingon, usab, nga sa niining ulahing mga adlaw, “Iyang igabubo ang Iyang Espiritu ibabaw sa tanang unod,” ug Iya nang nabuhat kini. Wala na kana magkinahanglan ug bisan unsang pagbatbat. Nagkinahanglan lamang kana ug pagdawat, usa ka tawong modawat sa kung unsa may nabuhat sa Dios. Dili na kini nagakinahanglan ug usa ka hubad. Ang Dios mao’y nagahubad sa Iyang Kaugalingong Pulong. Ang Dios nagsaad sa mga butang nga atong makita, sa matag adlaw, nga Iyang buhaton kini sa katapusang adlaw.

<sup>76</sup> Ang mga tawo karon, sama niini kaniadto, sila nagasalig diha sa ilang kaugalingong salabutan. “Ang akong pastor nagaingon nga usa kana ka ‘panatisismo.’” Apan ang Biblia nag-ingon nga mahitabo kini. Kang kinsa mang salabutan ang inyong saligan?

<sup>77</sup> Ang Biblia nagsaad sa katapusang mga adlaw, nga, “Ang Panahon sa Iglesia sa Laodicea maga-mabahandianon kaayo, ug magmadagaya— . . . o magmatagbawon sa ilang kaugalingon, ‘ako’y dato. Wala’y nakulang kanako. Nagalingkod ako ingon nga rayna.” Ug dato siya. Ug Siya miingon, “Wala ka mahibalo niini nga ikaw makalooloy.” Karon mao kana ang kinatibuk-ang panahon sa iglesia, ang iglesia! “Ngadto sa iglesia sa Laodicea, hubo ka, buta, kabus, makalooloy, ug wala mahibalo niini.” Nagalingkod diha sa iyang mga bahandi, napulo ka libo ug ka pilo sa napulo ka libo, ug linibo ang mga sakop, bahandi sa kalibutan anaa sa iyang kamot, sa halus. Tigumon kining tanan, hangtud karon, uban sa iglesiang Katoliko ug mga Protestante, tanantanan na, ingon nga nagakahiusa na sila, anaa kanila ang bahandi sa kalibutan.

<sup>78</sup> Nagkabangkaruta kita niining nasura, hapit na. Nagapangutang kita sa buhis nga bayaran pa sa kap-atan ka tuig gikan karon, ilang ginasulti kanako, mao’y ilang giingon diha sa *Life Line*. Mga buhis, nga ato nang ginagasto karon, pagabayaran sa kap-atan ka tuig gikan karon. Ang akong gamay’ng apong lalaki, kung madugay pa si Jesus, ang mga buhis nga iyang bayaran kung magpanuigon na siyang kap-atan ka tuig, kita nagagasto na niini karon. Nagapadala ug hinabang alang sa ubang nasud, ug ang atong kaugalingong mga Indian ug mga ingon niana nanghimalatyon na sa gutom; nagapaninguha pagpamalit ug pakigdinaitay. Wala ka nagapalit ug pagpakigdinaitay. Wala ka nagapalit ug higala. Dili, apan mao kana ang atong ginabuhat. Ingon niana ang atong



pagkahimutang, ginabuhisan ang katawhan sa bisan unsang butang nga ilang masudlan ngadto, buhis, buhis, buhis. Ug dili pa kita sa gihapon makalingkawas sa utang sa pakiggubat sulod sa—sulod sa gatusan ka mga katuigan, sa paghunahuna ko, nga diin kita gibalhog ngadto sa mga politiko. Ug karon dili kita kinahanglan ingon niana. Wala’y katarungan alang kanato nga maingon niana.

<sup>79</sup> Apan ang mga kaiglesiahanan, sila mismo, nangahimo nang bahandianon. “Hapit na ang tanang bahandi sa kalibutan,” ginaingon sa Biblia, “napahimutang diha sa iglesiang Katoliko.” Mao kana ang hinungdan nga ang Rusya gipapahawa siya, kon nganong gitiwalag sa Rusya. Mao gayud kana ang sukaranan sa komunismo, tungod kay ang maong iglesia nagtudlo man aron mamahimong sa kung unsa, wala na’y nahibilin alang sa uban pa sa kalibutan.

<sup>80</sup> Sa dihang didto pa kami sa Finland, kadtong batang lalaki gibanhaw gikan sa kamatayon. Didto nagtindog silang mga Rusong sundalo diha sa pagbantay, ug sila miingon, “Among dawaton ang usa ka Dios nga makahimo sa pagbanhaw ug patay.”

<sup>81</sup> Nanagbuhat kita ug mga denominasyon, ug mga tulonghaan ug—ug mga gambalay, ug napakyas sa pagbuhat kung unsay gisulti ni Jesus nga atong buhaton, mao ang “Iwali ang Maayong Balita.” Ato nang gisulayan pag-edukar ang kalibutan. Wala gayud Siya miingon, “Edukaha ang kalibutan; siya nga n-edukar mamaluwas.” Kinahanglan nga matawo ka pag-usab, mapuno sa Espiritu. Mao kana’y hinungdan nga makalooloy kita kaayo nga nangapakyas, sa bisa’g asa. Kita n’yo, naangkon na nato ang bahandi, naangkon na nato ang maong butang.

<sup>82</sup> Karon unsa may mahitabo? Ug sa dihang kining maong iglesia, ang World Council of Churches, nagakahi-usa na, dili ba ninyo makita kung kinsay magadumala? Wala ba kamong mga Methodist ug Presbyterian makasabot niana, ang uban pa kaninyo, bisan pa ngadto sa mga Pentecostal? Nagaingon kamo nga wala kamo nagapahisulod. Mahimo nga mosulod mo o inyong lumpagon ang denominasyon. Buhaton ninyo ang usa o ang laing usa. Anaa kini mismo sa inyong atubangan, kinahanglan mopili kamo niini. Usa kini ka pinugsanay, ang marka sa mapintas nga mananap. Ug mao kana kon unsa kini, sa tukma. Ang denominasyonismo sa dili malalis (mapamatud-an ko kini pinaagi sa Biblia) mao ang marka sa mapintas nga mananap. “Usa siya ka bigaon; aduna siya’y anak nga mga babayeng bigaon.” Ug kita nakahibalo nga mao kana ang Kamatuoran. Ang giorganisa nga relihiyon, supak kini sa Pulong, ug anti-Cristo kini sa iyang mga sukaranan. Dili ang tanang butang dinha anti-Cristo; kondili diha sa iyang mga sukaranan, ang sistema niini anti-Cristo, tungod kay supak

kini sa Pulong sa Dios. Ang matag giorganisa nga sistema ingon niana.

<sup>83</sup> Tan-awa, kita n'yo, ug nagasalig kamo sa kang bisan kinsang kaugalingong salab-...sa ilang salabutan, imbis nga nagasalig ngadto sa salabutan sa Dios, sa kung unsay giingon sa Dios bahin niini. Mao kana ang hinugdan nga sayup kini. Ang mga kalalaken-an nagapangadto sa mga seminaryo nga aduna na'y maayong edukasyon, mangadto niining mga tulonghaan sa Biblia, nga ginatawag. Ug tingali'g aduna sila'y pagtawag—adunay pagtawag ang Dios sa ilang kasingkasing! Ug manggawas sila gikan didto ug sila gipangpalig-on ngadto sa usa ka panghunahuna, nga, “*Si ingon niini-ug-ingon niana nag-ingon niini, si Obispong ingon niini-ug-ingon niana. Kining usa nag-ingon niini. Kadtong usa nag-ingon niini. Ang konseho sa mga tawong nanagkauyonay, sa ingon niini kinahanglan mamahimo kini.*”

<sup>84</sup> Wala ko ginatagad kung unsa may ginaingon ni bisan kinsa! Si Jesus miingon, “Ang matag pulong sa tawo bakak, ug ang sa Ako mao'y Tinuod. Bisin sa kung kinsa pa kini, ang sa Ako mao'y Tinuod!”

<sup>85</sup> Karon unsaon man nato sa pagkahibalo kon unsa'y Kamatuoran? Sa dihang nagadiklara ang Biblia nga adunay butang nga mahitabo, nga may butang nga magakahitabo, ug kini nagakahitabo sa nianang paagi.

<sup>86</sup> Karon, ang Biblia nag-ingon, “Diha kaniya mao ang—ang bahandi sa kalibutan; bulawan, ug salapi.”

<sup>87</sup> Karon kung kita anaa sa pang-bulawan nga sukaranan sa panalapi, ug kita nabangkarote, karon unsa may mahitabo? Unsa na may mahitabo? Nahibalo na mo, ang mga tawong bahandianon niining nasura, kining dagkung mga pabrika, ug mga negosyante sa bino ug mga negosyante sa tabako, ug uban pa nga sama niana, dili mobarug aron sa pag-ilis sa panalapi, busa ang bugtong butang nga atong kinahanglan buhaton mao ang pagpanghulam niini. Ug adunay usa lamang ka dapit nga atong mahulaman niini. Ug sa dihang atong buhaton, ato nang ginabaligya ang atong pagkapanganay ngadto niini. Husto kana. Nan unsa na may inyong pagabuhaton? Gipanag-iya na kamo niini, nianang sistema. Wala na'y lain pang, inyong mahimo.

<sup>88</sup> Oh, mga tawo, ayaw gayud paghunahuna nga ako... Tingali'g nagahunahuna kamo nga nabuang na ako. Apan sa dihang ang akong tingog gipahilum na diha sa kamatayon, kining mga teyp sa gihapon magpabilin nga patukaron, ug inyong mahibaloan nga kon unsa may akong giingon nangatuman. Mahimo akong usa sa labing buang-buang nga tawo sa pagpili niining baruganan nga akong gipili, bisan pa sa pagsupak niining butanga, ako—ako mamahimong—ako mamahimong kabatok sa Dios, mamahimo akong kabatok sa

tanang butang nga iya sa Dios, kung ako man (kung ako man adunay) sayup sa akong panghunahuna ug sa akong pagkatinawag. Ang maong butang mamahimong kabatok sa Dios. Apan gitindogan ko ang akong baruganan tungod kay akong nakita kini dinhi sa Pulong. Pulong kini sa Dios. Dayon nakita ko kini nga ginapamatud-an, gipamatud-an nga kini mao ang Kamatuoran. Mao kana ang pagbatbat nga ginahatag sa Dios sa Iyang Pulong. Ang Kaugalingong pagbatbat sa Dios sa Iyang Pulong mao nga kung ginaunsa Niya sa pagpamatuod Niini ug ginahimo Kining tinuod.

<sup>89</sup> Nganong mga buta man kining mga Fariseo? Unsa may nakapahimo kanila nga buta gayud? Tungod kay dili sila modawat sa pinadayag o sa kapanghimatuoran sa Pulong.

<sup>90</sup> Ug mao kana ang hinungdan karon nga ang mga kaiglesiahanan buta, tungod kay dili sila modawat sa pinadayag nga ginapanghimatud-an. Kon ang Pulong nagaingon nga mao, ug kini nahipadayag, ug kini unya gipanghimatud-an, sa gihapon dili sila modawat Niini.

<sup>91</sup> Mao kana ang hinungdan nga kining mga Judio, ang mga Judio hangtud karong panahona, dili gayud. Dili ka mahimong makigsulti kanila bahin kang Cristo, tungod kay ang taptap anaa pa sa gihapon sa ilang nawong, mga gibutaan.

<sup>92</sup> Ug sa iglesia, dili mo mahimong isulti kanila ang mahitungod sa kinatibuk-ang Maayong Balita ug ang gahum sa Dios, tungod kay ang dios niining kalibutana nagbuta kanila sa mga kamatuoran sa Dios, ug nagasalig sila sa ilang kaugalingong salabutan. Sa dihang ang mga kababayan-an nagasulod sa simbahan ug nagapaputol sa ilang buhok, tungod kay ang ilang mga pastor nagaingon man kanila, “Oh, puede ra na. Buang-buang man kanang tawhana.” Apan ang Biblia nag-ingon nga nakabuhat siya’g sayup kung ginabuhat niya kini, wala ginatubag sa Dios ang iyang pag-ampo. Ug ang uban kanilang mga kababayan-an nagabuhat ug lain pang kaulawan, ug nagapaninguha nga mahimong usa ka magwawali, nan iya nang nabuhat ang maong duha ka butang. Ang Biblia nag-ingon nga dili niya kana angay buhaton, wala gayud niini. Apan ang iglesiang organisasyon modawat niini, ug ordinahan siya ug ipadala siya. Nangasalig na sila sa ilang kaugalingong salabutan!

<sup>93</sup> Usa ka Pulong sa Dios nga gisayup pagpahimutang, o gisayup pagpasabot, o wala Kini dawata, mao’y nagabugto sa tibuk Kasumpayan. “Ang tawo mabuhi dili sa tinapay lamang, kondili sa matag Pulong nga nagagula sa baba sa Dios.”

<sup>94</sup> Ngano man kini, mga kababayan-an, nadungog na ninyo ako nga nagawali batok niining mga butanga, sa pagsul-ob ug mga purol, ug pagpamintang, ug—ug hirdo sa buhok dinhi niining giputol nga buhok, ug nianang tanang matang sa butang, ug

unya sa matag tuig sa akong pagbalik anaa ra gihapon kamo sa maong kahintang? Mao tungod kay nagasalig kamo sa inyong kaugalingong salabutan inay sa Pulong sa Ginoo.

<sup>95</sup> Ug, mga pastor, nganong dili man ninyo hinloan ang inyong iglesia? Tungod kay nagapaingon na man kamo sa inyong pang-denominasiyon nga kredo inay sa Pulong sa Ginoo. Husto. Ayaw pagsalig sa kaugalingon ninyong salabutan. Bueno, ayaw pagsalig sa kaugalingon ninyong salabutan, kondili diha sa Pulong sa Ginoo.

<sup>96</sup> Dili sila modawat niini, tungod kay dili sila modawat ug kapanghimatuoran. Si Jesus miabot uban sa usa—usa ka Maayong Balita, sa tukma gayud nga paagi nga Iyang giingon nga Siya moabot. Bisan sa makadaghang higayon . . .

<sup>97</sup> Nalibog ug diyutay si Juan sa dihang gibanlod siya sa bilangoan, ug siya—siya nahiabot didto . . . Ug miwali siya nga adunay “Nagasingabot nga Mesias, Kinsang paliran anaa na sa Iyang kamot; pagahinloan Niya pag-ayo ang Iyang giukan, ug pagasunugon ang mga uhot uban sa kalayo nga wala’y pagkapalong, ug pagatigumon ang trigo ngadto sa dapa.” Ang Espiritu sa Dios nga nagapadagayday, nga nagapabuhagay gikan kaniya sama sa usa ka—usa ka tuburan. Ug sa dihang nakita niya si Jesus nga nahiabot na sa eksena, ang gamay, maaghop, mapaubsanong matang sa Pagkatawo nga ginatamay-tamay lang, nagapahilit nganhi, alang sa Iyang kinabuhi, ug dapit didto. Nganong, dili nila . . .

<sup>98</sup> Dili kini masabtan ni Juan, busa iyang gipadala ang pipila sa iyang mga tinun-an aron sa pagsuta kang Jesus kung Siya na ba gayud kadtong Usa. Daw sa unsa ka pagpakaulaw ngadto kang Jesus! Human kadtong maong propetaha nga nagatindog didto sa tubig, uban sa Pulong sa Dios, miingon, “Nakaila ako Kaniya, tungod kay akong nakita ang—ang Balaang Espiritu, sama sa salampati, ang Dios nga nagakunsad gikan sa Langit sama sa usa ka salampati ug nagapaingon Kaniya, ug nadungog ko ang usa ka Tingog gikan sa Langit, nga nagaingon, ‘Kini mao ang Akong Anak nga pinalangga,’” ug unya nagaingon na si Juan, “Lakaw, pangutan-a Siya kung Siya na ba gayud ang maong Usa, o—o—o, ‘Magapaabot pa ba kita’g lain?’”

<sup>99</sup> Karon si Jesus wala gayud mipadala kaniya ug libro kung unsaon ang pagbinuotan sulod sa bilangoan, o kon unsang iglesia ang iya kinahanglan untang gipasakopan. Apan miingon Siya, “Pabilin lang una sa makadiyut ug bantayi kung unsay nagakahitabo, ug dayon lakaw ug suginli si Juan sa mga butang nga nangahimo ug inyong nakita,” tungod nga ang Iyang mga buhat nga Iyang gibuhay nagpamatuod nga Siya mao ang Mesias, ang Anak sa Dios. “Bulahan siya nga dili makakaplag ug kahigayonan nga mapandol siya Kanako.”

<sup>100</sup> Daghan kaayo ang mga nangapandol. Daghang mga tawo ang dali kaayong mapandol sa Pulong sa Dios. Kini—kini kasupak, gusto nilang mosalig sa ilang kaugalingong salabutan. Dili nila gusto dawaton ang Pulong sa Ginoo. Ug kinahanglan nilang molakaw gayud sa dalanon nga—nga gikatudlo na kanila nga ilang laktan. Ug sa dalanon nga gikatudlo kanila, ang ilang Iglesia nagasalig diha niini. Bisan pa kung ang Dios nagsaad nga Siya—nga Siya magpaulan, magpaulan sa buntag, ug ang iglesia miingon “binuang kana,” ilang toohan ang iglesia inay ang Dios. Tungod kay ngano man? Gipakatawo sila sa simbahan.

<sup>101</sup> Apan ang tawo nga gipanganak sa Dios, mao’y Binhi sa Dios. Ug ang binhi sa Dios mao ang Pulong sa Dios, ug nagkinabuhi lamang siya pinaagi Niana. Mao kana ang iyang Kinabuhi.

<sup>102</sup> Karon, nagsalig sila ngadto sa ilang kaugalingong salabutan, apan dili sila gusto mosalig sa Pulong sa Dios. Labi pa silang nahibalo. Anaa kini sa Kasulatan. Ilang gitawag kini nga usa ka “dautang espiritu,” kanang Tawhana. Kay ngano man? Ang ilang pari nag-ingon, “Ang si bisan kinsa nga nagaadto aron sa pagpaminaw niining Tawhana nga nagawali, papahawaon sila gikan sa sinagoga.”

<sup>103</sup> Sa dihang giayo ang usa ka tawo nga kanhi usa ka buta, pinaagi ni Jesus. Bisan pa ang iyang mga ginikanan, nalipay pag-ayo mahitungod sa maong kaayohan, apan nahadlok sila sa pagsugid nga si Jesus kadtong nagbuhat niadto. Oo.

Miingon siya—miingon siya, “Inyo ba kining anak?”

Miingon, “Oo.”

Miingon, “Kinsa man ang nag-ayo kaniya?”

<sup>104</sup> Miingon, “Ako—wala ako mahibalo.” Miingon, “May pangidaron na man siya, pangutan-a siya. Siya, siya makasulti na sa iyang kaugalingon.”

<sup>105</sup> Tungod kay, kini gikaingon na, nga, “Ang si bisan kinsa nga nagsalig ngadto Kaniya, sa salabutan ni Cristo,” inay sa ilang salabutan, “itiwalag gayud sa ilang iglesia.” Karon dili ba mao ra sa gihapon kana? Nagapangutana ako kaninyo usa ka deretsohay nga pangutana. [Ang kongregasyon nagaingon, “Amen.”—Ed.] Husto kana. Naghulagway kini sa mao ra gihapong butang. Bisan unsa pa ang ginabuhay sa Dios, gikinahanglan gayud nga sumala kini sa ilang salabutan, dili sa kung unsay ginapamatud-an sa Dios nga mao’y Kamatuoran. Karon, ug kadtong maong tawhana aduna may ikatubag, bisan pa.

Miingon siya, “Kinsa ang nag-ayo kanimo?”

Siya mitubag, “Ang Usa ka gihinganla’g Jesus nga taga-Nazaret.”

Miingon, “Siya usa ka makasasala. Wala kami makahibalo kon diin Siya gikan.”

106 Matud niya, “Karon talagsa-on kana nga butang. Mga pangulo man unta kamo niining panahona. Ug aniyay usa ka Tawo nga nagpabuka sa akong mga mata, nga wala pa nahimo sukad pa sa pagsugod sa kalibutan, ug sa gihapon moingon kamo nga wala kamo mahibalo kon diin Siya gikan.” Oh, sus!

107 Ngano man? Nanagsalig sila sa ilang kaugalingong salabutan inay sa Pulong sa Ginoo. Tungod kay nag-ingon si Isaias, “Ang buta makakita, ang bakul molukso sama sa lagsaw, ang kamingawan managmaya sa tumang kalipay.” Apan inyong makita nga nagsalig sila sa ilang kaugalingong salabutan, dili ngadto sa Pulong; sa ilang kaugalingong sistema nga ilang gibuhat.

108 Karon himatikdi ang mga kaiglesiahanan karon nga ginabuhat ang mao ra gihapong butanga. Ilang giporma ang labing hawod nga kalawat sa salabutan, diha sa ilang pangdenominasyon nga mga sistema. Nga, aduna na sila’y ingon ka hilabihan nga pagpanabot, dili sila gusto sa kang bisan kinsa man nga magbinuang niini, wala’y si bisan kinsa nga makasulod gawas lamang kung nahisakop sila nianang maong pundok.

109 Ayaw ko’g suginli; nagapuyo ako sa Tucson, Arizona. Miadto ako didto tulo na ka tuig ang milabay, nakigttagbo ako uban sa maong konseho sa kasimbahanan, ug ako miingon, “wala gayud ako nagaanhi aron magsugod ug usa ka simbahan. Nagaanhi ako aron sa pagpakig-ambitay uban kaninyo. Nagaanhi ako aron sa pagtabang kaninyo. Usa ako ka misyonaryo, ebanghlista, kon unsa may akong ginahimo.”

Miingon sila. “Nagaanhi ka ba aron magsugod ug usa ka simbahan?”

110 Matud ko, “Dili, sir. Nagaanhi ako dinhi...Kung gusto ko pa ug simbahan, anaay akong usa sa Indiana.” Matud ko, “Nagaanhi ako dinhi tungod kay gipangunahan ako sa Ginoo dinhi diha sa usa ka panan-awon. Magapabilin ako karon sa pipila ka panahon, gawas kon ginapangunahan na Niya ako sa paglakaw, apan wala gayud ako nagaanhi aron magsugod ug usa ka simbahan. Nagaanhi ako aron tabangan kamo nga mga kaigsoonan.”

111 Tulo na kadto ka tuig ang milabay. Wala na gayud ako gidapit sa maong lugar. Ngano man? Tungod kay dihay panagkatigum human mismo niadto, ug nag-ingon, kung aduna may tawo nga mopagamit kanako sa ilang pulpito, ilang palagputon kana nga magwawali. Kita n’yo? Ngano man? Nagasalig man sa ilang kaugalingon nga salabutan! Mao gayud, mao kana ang giingon, ilang ginamugna ang ilang hawod nga salabutan.

112 Gawas kung imong ginapalista ang imong ngalan diha sa ilang libro, ikaw...ikaw nahisalaag gayud. Usa ka ministro

nagsulti kanako niana. “Oh,” moingon ka, “pipila ka mini kana.” Usa kadto ka Pentecostal.

<sup>113</sup> Si Jack Moore ug ako naglingkod didto ug naminaw kaniya sa Dallas, Texas. Matud niya nga iyang, “Kinahanglan panason ang usa ka tawo gikan sa maong libro.”

Matud ko, “Ngano man?”

“Tungod kay nakipagkauban siya kanimo.”

Matud ko, “Bueno, panasa.”

Miingon siya, “Bueno, siya mahisalaag na kon ingon-ana.”

Matud ko, “Mahisalaag?”

“Aba,” miingon siya, “kon ang iyang ngalan wala na niini!”

<sup>114</sup> Matud ko, “Ang buot nimong ipasabot nga ikaw usa ka pang-districtong presbiterio ug nagatoo niana?”

Matud niya, “Mao kana ang kamatuoran.”

<sup>115</sup> Matud ko, “Pahawa sa telepono, mister. Ikaw, ikaw. . . Dili kana mao ang grasya sa Dios, kana—kana, nakita mo.”

<sup>116</sup> “Kay pinaagi sa usa ka Espiritu kitang tanan gibautismohan ngadto sa usa ka Lawas, ug nahimong mga bahin nianang Lawas.” Dili igsapayan kung unsa may imong naangkon nga marka diha kanimo, wala kana’y kalambigitan niini. Ikaw sa wala’y duhaduha usa ka Cristohanon pinaagi sa Pagkahimugso. Mao ra gayud kana ang paagi, ang maong bugtong paagi nga mamahimo ka; dili pinaagi sa pagpasakop, dili pinaagi sa mga kredo, dili sa mga pagpangbati *niini*, o sa pag-asoy-asoy *niini*, o sa laing pang mga butang, dili bisan pa sa edukasyon, sa teolohiya. Nahimo kang Cristohanon sa dihang natawo ka pag-usab, ug dili ka matawo pag-usab gawas kung pinili ka nga matawo pag-usab. “Kay wala’y makahimo sa pag-ari Kanako gawas lamang kon siya pagadanihon sa Akong Amahan, ug ang tanan nga gikahatag sa Akong Amahan Kanako magaduol.” Amen. “Pagabanhawon Ko siya pag-usab sa kaulahiag adlaw.”

<sup>117</sup> Kining dinagkung gitawag nga mga tulonghaan sa Biblia nga ania kanato, moingon sila, nagasalig diha sa kaugalingon nilang hingkat-onan. Oh, sus. Sila, bisan kung unsa pay ginaingon sa Pulong, mahimo nilang isaysay kini sa yano kaayo, oh, diha sa ilang mga kaugalingon, patoohon ang ilang mga kaugalingon niini, ug sa mga parihas kanila motoo niini, nga, “Ang mga adlaw sa mga milagro milabay na. Wala na’y butang nga ingon niana sama sa propeta, mga propeta, mga apostoles. Wala na’y ingon nianang butanga sama sa mga gasa sa pagpang-ayo, ug uban pa. Kini nangatapus na kanhi sa mga panahon sa Biblia.” Mahimo nilang patoohon ang ilang mga kaugalingon niana.

<sup>118</sup> Nahibalo mo, ang Biblia nag-ingon, “Mahimo kamong managpanoo sa bakak ug mamahimong pagkahinukman sa silot

pinaagi niini.” Kita n’yo, mao gayud kana ang Kamatuoran. Nanagmugna sila, bisan kung unsa pay ginaingon sa Pulong sa Dios, nagasalig sila sa ilang kaugalingong salabutan. Sila, nangasalig sila niini, nagatoo sila niini, nagadahum sila nga kini ang Kamatuoran. Mahimo kamong magpadayon sa pagtoo sa usa ka bakak, usab ug usab ug usab, hangtud nga kini mao na ang Kamatuoran alang kanimo. Tinuod kana.

<sup>119</sup> Apan unsaon man nato sa pagkasayod kung kini mao’y Kamatuoran o dili? Dios ang nagapamatuod nga kini mao ang Kamatuoran, tungod kay kini anaa diha sa Iyang Pulong ug Iya Kini ginapamatud-an. Siya ang nagabuhat sa Iyang Kaugalingong paghubad Niini.

<sup>120</sup> Ginaunsa man nila pagbuhat, nga mahiadto niini? Ilang ginabuhat kini pinaagi sa ilang nakat-onan, sa ilang edukasyon, sa ilang mga pagpanabot sa—sa hut-ong sa titulo sa pagka-doktor, ug uban pa, nga sila gikan sa usa ka seminaryo ug nakakat-on niining mga butanga.

<sup>121</sup> Apan tan-awa, mga higala, paminaw. Wala gayud diha sa Biblia nga gikinahanglan kanato ang pagsabot. Wala gikinahanglan kanato ang pagsabot Niini. Ang gikinahanglan kanato mao ang pagtoo Niini. Ang pagtoo Niini pinaagi sa unsa? Pinaagi sa pagtoo. Kung sabton mo Kini, nan mao kana’y nagapawala’y-kapuslanan sa pagtoo. Dili mo masabtan Kini, apan bisan pa niana imong ginatoohan Kini. Kung mahimo ko pang masabtan ang Dios, dili ko na kinahanglan motoo pa sa Dios. Dili ko masabtan ang Dios. Wala’y tawo nga makasabot sa Dios. Dili ko masabtan ang Pulong sa Dios, apan akong ginadawat Kini. Akong ginatoohan Kini. Wala ko gimanduan nga sabton Kini.

<sup>122</sup> Wala ako, miadto sa unsa mang seminaryo ug sa tanan niining dagkung mga pagpanabot sa tawhanong kahibalo bahin Niana. Ang nahibaloan ko lang nga ang Biblia nagaingon Niana, “Si Jesus Cristo mao sa gihapon kagahapon, karon, ug hangtud sa kahangturan,” ug ako Siyang ginapangita diha sa mao rang matang. Nahibalo ako nga nagsaad Siya kon unsay Iyang buhaton niining panahona, ako Siyang ginapaabot sa pagbuhat niini ug Iya kining ginabuhat. Husto kana. Nagsaad Siya ug grasya, akong gipaabot kini ug nadawat ko kini. Nagsaad Siya ug kaayohan, akong ginatoohan kini ug akong gidawat kini, ug akong nadawat kini.

<sup>123</sup> Karon dili ko buot kuhaon pag-ayo ang inyong panahon, apan buot kong mangutana ug usa ka butang kung mopailub kamo uban kanako sa usa ka gutlo, aron hunahunaon kadtong pipila nga wala nagsalig sa ilang kaugalingong salabutan; pipila ka mga tawo sa Biblia, mga diyutay ra, nga wala magsalig sa ilang kaugalingong salabutan, bisan pa kung unsa may salabutan sa ilang panahon.



<sup>124</sup> Atong hisgutan, pananglitan, si Noe. Si Noe nagpuyo sa panahon sa dinagkung syentipikanhong pagpang-usisa. Sa mga adlaw ni Noe, malagmit nanagbuhat sila ug mga pyramid, nga dili na nila mahimo pag-usab. Karon wala pa gayud kita’y ato aron sa pagbuhat niini, wala pa gayud nga mahimong moalsa sa dagkung mga bato pasaka didto. Dili nila mahimo, sa karon. Sa ilang mga adlaw, dihay ilang pipila ka matang sa kemikal nga ilang ikabutang sa pagtina ug buhaton ang mga panapton nga natural tan-awon hangtud karon. Dihay ilang pang-embalsamar nga likido nga makahimo sila ug mummy; dili kita makabuhay ug usa, karon, kon ato gyud buhaton. Adunay atong. . . daghan nang kaigmat ang nangawala kanato. Sa maong adlaw nga iyang gipuy-an, diha sa manggialamon ug syentipikanhong panahon.

<sup>125</sup> Naghisgot si Jesus ngadto niini, nga kanang susamang panahon mobalik pag-usab sa dili pa Siya mobalik, “Kay maingon sa nahitabo kaniadto sa mga adlaw ni Noe.” Karon motoo na kamo, niana, dili ba? [Ang kongregasyon nagaingon, “Amen.”—Ed.] Nagatoo ba kamo nga nag-ingon si Jesus niana? [“Amen.”] Nagatoo ba kamo nga nahibalik na kita nianang panahona? [“Amen.”] Karon anaa kana sa Libro ni Lucas, sa ika-17 nga kapitulo ug sa ika-29 nga bersikulo.

<sup>126</sup> Karon sa Lucas 17:30, Siya nag-ingon, “Ug maingon sa nahitabo kaniadto sa mga adlaw ni Lot, sa dihang ang Manulonda sa Ginoo. . . .”

<sup>127</sup> Karon, ginabasa Niya kadto sa mao ra nga Biblia nga atong ginabasa. Ug sa dihang Iyang. . . Balika ug susiha kung unsang matanga sa panahon kadto sa wala pa ang ulan ni Noe. Balika ug susiha kung unsang panahona kadto sa wala pa gilaglag ang kalibutan sa maong mga adlaw ni Lot. Susiha kung unsa kadto, ug inyong makita ang bahin sa kung unsa ang ginasulti ni Jesus.

<sup>128</sup> “Sa mga adlaw ni Noe, nanagpangaon sila, nanag-inom, nanagpangasawa, ug nanagminyo; wala kini nahimatikdi hangtud nga si Noe misulod na sa arka, ug ang lunop miabot, nangalumos silang tanan.”

<sup>129</sup> Sa mga adlaw ni Lot, sa wala pa gayud ang kalibutan na. . . gisunog sa kalayo ang kalibutan nga Gentil, ang mga Sodomanhon, adunay mga bayot ug tomboy, mga kahiwi-an, tanan nang butang sa kalibutan. Usa ka dakung. . . Usa kadto ka modernong Los Angeles; dili usa ka modernong Los Angeles lamang, kondili Estados Unidos; dili lamang sa Estados Unidos, kondili ang kalibutan. Siguradong usa kadto ka kahiwan! Ang tawo nawad-an na sa ilang natural nga tinubdan sa kinabuhi ug sa ilang natural nga mga panabot sa salabutan, nangahimo nang hiwi pinaagi sa dautang espiritu nga nag-usab sa tibuok palakaw sa ilang natural nga kinabuhi, ug giulipon sila sa mga espiritu sa demonyo. Kung dili pa kana mao’y hulagway sa mga adlaw ni Noe, wala na ko mahibalo niini, ug sa mga adlaw ni Lot, ang akong buot ipasabot. Sa mga adlaw

ni Noe, usab, nanagpangaon, nanag-inom, nanagpangasawa, nanagpangminyo, ang mga hawanan sa panagbulag nangapuno, ug tanan na, maingon gayud sa nahitabo kaniadto.

<sup>130</sup> Apan, hinumdumi, sa wala pa gilaglag ang kalibutan, si Abraham gipadala ibabaw sa nawong sa yuta ug gihatagan ug saad nga usa ka anak nga lalaki. Ug gikahibalag ni Abraham ang Dios sa daghang mga hugna, ingon nga tipo sa iglesia nga mihibalag sa Dios. Apan sa wala pa gayud ang paglaglag ug ang gisaad nga anak nga lalaki mibalik, o miabot, diay, ang maong anak nga lalaki gisaad na, miabot, ang Dios mikanaug ug nahipadayag sa unod, diha sa usa ka tawo, tulo ka mga lalaki. Ug nangadto sila kang Lot; miadto una kang Abraham, ug sila nanglingkod. Ug giusab ang ngalan ni Abraham gikan sa Abram ngadto sa Abraham; si Sarai ngadto sa Sarah.

<sup>131</sup> Ug kining Tawhana, ang mamumulong, si Elohim, sa dihang Siya mikanaug aron makigsulti ngadto kaniya, unsay Iyang giingon? Miingon Siya, “Hain man ang imong asawa, si Sarah?”

Miingon, “Anaa siya sa balongbalong, sa Imong luyo.”

<sup>132</sup> Miingon, “Magaduaw Ako kanimo sumala sa panahon sa kinabuhi.” Ug mikatawa siya sa sulod sa balongbalong, sa luyo Kaniya. Ug miingon Siya, “Nganong mikatawa man si Sarah?” Kita n’yo? Karon nahimo Niya untang kuhaon ang kinabuhi ni Sarah mismo dayon didto, tungod sa pagkatawa sa Iyang Pulong; apan dili kini Niya mahimo, tungod kay si Sarah kabahin ni Abraham.

<sup>133</sup> Ug karon, si Jesus nag-ingon sa Lucas ika-17 nga kapitulo ug sa ika-30 nga bersikulo, “Maingon sa nahitabo kaniadto sa mga adlaw ni Lot, maingon man usab niini sa katapusang panahon sa diha nga ang Anak sa tawo . . .”

<sup>134</sup> Karon hinumdumi, “Ang Anak sa tawo” mao’y usa ka *propeta*. Gitawag ni Jehovah si Ezekiel nga usa ka “anak sa tawo.” Si Jesus nagaanhi diha sa tulo ka mga ngalan: Anak sa tawo, Anak ni David, Anak sa Dios. Iyang gitawag ang Iyang Kaugalingon “Anak sa tawo” aron nga masabtan sa mga tawo, tungod kay Siya mao kadtong Propeta nga ipatindog sa Ginoong Dios.

<sup>135</sup> Karon matikdi, dayon Iyang gisaad ang unsa? Ipadayag pag-usab sa Anak sa tawo ang Iyang Kaugalingon sa dili pa kanang panahona, sa dili pa ang kalayo. Ug mao kadto ang katapusang ilhanan nga nakita ni Abraham sa wala pa miabot ang gisaad nga anak nga lalaki; ug nahibalik siya sa usa ka pagkabatan-ong lalaki, ug siya sa pagkabatan-ong babaye. Sa wala pa . . . Karon himatikdi, ang Kasulatan sa tino nagaingon niana, karon kinahanglan atong lantawon kana.

<sup>136</sup> Ug unya kung atong makita ang kalibutan diha sa kahiwian ug sa mga butang nga anaa niini karon, nadala diha sa kahimtang nga anaa niini, nan unsaon man nato sa pagkaingon

nga husto kana ug dili moingon nga kining laing usa husto? Tungod kay, sa usa ka tawo, nagasalig kamo diha sa ilang salabutan, ug dili sa salabutan sa Prinsipe sa Kinabuhi Kinsa mao kadtong Persona nga atua didto sa ganghaan uban kanila sa Sodoma. Karon, atong mahimatikdan, wala kita nagasalig sa atong kaugalingong salabutan.

<sup>137</sup> Si Noe wala nagsalig ngadto sa iyang salabutan. Usa kadto ka dakung syentipikanhong panahon, apan wala siya nagsalig ngadto sa iyang salabutan sa iyang panahon. Kondili misalig siya sa saad sa Dios, ug nagbuhat pinaagi sa gahum sa Dios, ug nag-andam sa usa ka arka alang sa pagluwas sa iyahang panimalay. Sa dihang, sa wala'y duha-duha sukwahi kadto sa kasagarang panabot; wala'y tubig kaniadto sa ibabaw didto, wala gayud sukad pa. Apan siya nahibalo, kung giingon sa Dios nga maanaa, maanaa gayud. Busa wala siya misalig ngadto sa iyang kaugalingong salabutan, apan pinaagi sa pagtoo milihok siya pinaagi sa Pulong nga gisaad sa Dios. Ang Espiritu nagpalihok kaniya, ug gibuhat siya kini.

<sup>138</sup> Si Abraham, wala siya nagsalig sa iyang salabutan bahin sa tawhanong kinabuhi. Iyang gipangasawa ang iyang asawa sa mga panuigon nga disesyete anyos. Ania siya karon, kapitan ug lima na katuig ang kaguwangon, ug siya na man kanuman ug lima na ka tuig ang kaguwangon, ingon nga napulo ka tuig ang kamanghuron. Apan si Abraham wala misalig sa iyang salabutan, sa dihang miingon ang Dios nga Iya siyang hatagan ug anak nga lalaki pinaagi kang Sarah. Apan iyang gitawag ang bisan unsang butang, ang bisan unsang syentipikong kalig-onan nga sukwahi sa Pulong sa Dios, ang bisan unsang kahibalo nga gawas sa Pulong sa Dios, ingon nga daw kini dili mao. Ug iyang ginahatag sa Dios ang pagdayeg, sa makusganon, ginahatag Kaniya ang pagdayeg. Wala gani niya hunahunaa ang paglantaw sa iya mismong lawas o sa pagkaapuli sa lawas ni Sarah, o—o sa iyang lawas. Wala niya pamalandunga ang bisan unsang butang, kondili misalig diha sa saad sa Dios. Wala siya misalig sa iyang kaugalingong salabutan. Wala siya misalig sa mga pagpangatarungan.

<sup>139</sup> “Aba,” moingon ka, “Igsoong Branham, makatarungan nga dili ayohon sa Dios ang masakiton, aduna man kita’y daghang maayong mga mananambal.”

<sup>140</sup> Ang Biblia nag-ingon, “Atong hinginlan ang mga pagpangatarungan.” Wala kita nagapangatarungan. Ang pagtoo wala nagapangatarungan. Ang pagtoo nagatoo ug nagadawat. Timan-i.

<sup>141</sup> Apan siya mitoo imbis ngadto sa dili-pagtoo; ug nagatawag sa mga butang, nga wala pa diha, ingon nga anaa na, nga sa tuman supak kaayo sa bisan unsang pangatarungan. Apan wala siya nangatarungan. Gitoohan lamang niya kini. Wala’y mga pangatarungan nga makapamatuod nga kanang maong bata

matawo. Kadtong maong bayhana mokabat na sa mga kaluhaan ka tuig nga wala na ang iyang binulan, ug ang iyang lawas mao ra'g sama na sa patay. Ug sa dihang siya usa na ka gatus ka tuig ang kaguwangon, kaluhaan ug lima ka tuig human niadto, siya sa gihapon nagahatag sa Dios ug pagdayeg, nga supak sa bisan unsa man nga matang sa salabutan. Apan pinaagi sa pagtoo, nahibalo siya nga tumanon sa Dios ang Iyang Pulong. Wala siya nagsalig sa iyang kaugalingong salabutan.

<sup>142</sup> Unsa kaha kon si Moises misalig ngadto sa iyang kaugalingong salabutan, sa dihang gisultihan siya sa Dios nga iyang—kuhaon si Faraon...o ang mga anak sa Israel gikan sa kamot ni Faraon? Unsa kaha kon nagsalig siya sa iyang kaugalingong salabutan, sa dihang atua na siya didto duol sa Haligi nga kalayo, sa dihang ang Dios miingon, “Pag-adto didto ug Ako magauban kanimo”? Unsa kaha kon nagsalig siya sa iyang salabutan sa dihang gidala niya sila sa Dagat nga Mapula, ug atua sila didto sa tubig, ug ania ang Dios nagsaad kanila sa yutang saad? Unsa kaha kon misalig siya sa iyang kaugalingong salabutan, “Unsaon ko man sa pagtabok didto? Wala na kami panahon sa pagbuhat ug taytayan. Ania na ang mga kasundalohan nga nagasingabot na sa among luyo mismo. Ania ang mga bungtod sa matag kilid. Ania na man ang tubig sa among atubangan, ang Dagat nga Mapula”?

<sup>143</sup> Karon, kon misalig pa siya sa iyang kaugalingong salabutan, iya nang gituyhod ang iyang mga kamot ug midagan, mihapa sa tiilan ni Faraon, miingon, “Faraon, pasayloa ako, nasayup ako.”

<sup>144</sup> Apan wala siya misalig ngadto sa iyang kaugalingong salabutan. Kondili nag-ampo siya, ug giingnan siya sa Dios sa pag-abante, ug ang dagat nabuka, nga sukwahi sa tanang pangatarungan. Apan wala siya misalig sa iyang kaugalingong salabutan.

<sup>145</sup> Unsa kaha kon si Josue, sa dihang miadto siya didto uban sa napulo ka mga denominasyon, ug nanlakaw didto ug nakita ang yutang gisaad sa Dios, ug mibalik na unta uban kanila ug miingon, “Karon hulat sa makadiyut. Tinuod kini. Sama ra kita sa mga dulon kon tan-awon. Mga higanti sila. Unsaon man nato sa pagbuntog kanila? Wala gani kita’y bisa’g mga espada; kon unsa ra may atong napunit. Unsaon man nato sa pagsulod ug pag-angkon nianang maong yuta? Aba, dili gayud kini mahimo. Mas daghan sila kay kanato, kalim-an ka tawo batok sa usa. Mga binansay sila nga mga kasundalohan, ug wala ra gayud kita kondili usa lang ka hugpong sa mga magbalantay sa karnero ug maglalapok nga gikan sa Egipto. Unsaon man? Wala gani kita bisa’g taming ug nianang mga butang, unsaon man gayud nato sa pag-angkon niini?”

<sup>146</sup> Aba, ang salabutan siguradong magpamatuod nga dili nila mahimo kini. Bisan kinsang tawo nga sundalo sama kaniadto kaniya, o kang Moises, dili mahimong mosalig sa

ilang kaugalingong salabutan. Apan sa ilang salabutan, wala sila misalig ngadto. Apan nahibalo sila nga ang Dios nag-ingon, “Ako nang gihatag kaninyo kanang maong yuta. Lakaw angkona kini!”

147 Ayaw pagsalig sa imong kaugalingong salabutan. Kung mosalig ka sa kaugalingong mong salabutan karon sa dihang masakiton ka, tingali’g nagalingkod diha sa usa ka silyang may ligid, naghimalatyon na tungod sa kanser, sakit sa kasingkasing, ug ang doktor nagaingon nga ikaw mamatay na, kon nagasalig ka nianang maong salabutan, mamatay ka. Apan ayaw pagsalig nianang salabutan. Ayaw gayud.

148 Unsa na man ang bahin sa mga paril sa Jerico, nga ilang ginaingon nga mahimo nila ang pagpalumba ug karwahi sa palibot ibabaw kanila, silang mga dagkung bagâ nga mga paril? Ang Dios miingon, “Tumungas kamo didto ug liboti kini sa ingon kadaghan nga higayon, ug magpatunog ug trumpeta ug kamong tanan managdungan ug singgit, ug ang paril magun-ob.” Bueno, sa wala’y duhaduha mahimo kadto nga binuang alang sa karnal nga panghunahuna. Apan si Josue, nga nakahibalo kung unsa ang kabagâ kadtong mga parila, tungod kay nakabuhat na siya ug daghan nga paril didto sa Egipto. Nahibalo siya sa maong semento nga anaa kanila, kon unsa sila ka lig-on, aron nga mohawid kanilang mga lumbaanay sa karwahi sa ibabaw, ug bisan pa gani sa mga balay nga gitukod sa ibabaw niini. Apan wala siya misalig sa iyang kaugalingong salabutan. Iyang gitoohan nga kung unsa may giingon sa Dios mao’y kamatuoran, ug mituman sa Iyang Pulong, ug ang mga paril nagun-ob. Dili nagasalig ngadto sa iyang kaugalingong salabutan.

149 Unsa kaha kon nagapakigbugno siya niadtong maong gubat, ug, sama sa akong ginawali niadtong Domingo, ug unya ang maong adlaw nagasalop na, ang kaaway naparot na. Niadtong gabhiona managtigum sila ug sila’y mangabot uban sa usa pa ka laing kasundalohan, pamatyon ang daghan sa iyang mga tawo. Karon unsa kaha kon miingon siya, “Nagkinahanglan ako ug kahayag sa adlaw. Akong gikinahanglan ang dugang pang kahayag sa adlaw. Bueno, karon paghulat sa makadiyut. Gihan-ay sa Dios kining maong kahusay, ug ang adlaw nagatuyok busa nagatuyok ang kalibutan. Karon atong tan-awon, kung ingnon ko alang sa adlaw nga mohunong. . . Tingali kung ang kalibutan mohunong karon, nan mawad-an niini sa iyang pagbutad, mahulog ako”?

150 Wala niya paminawa ang iyang salabutan. Ang butang lamang nga iyang giingon, mao, “Adlaw, paghunong; ug, bulan, pagpabilin kon diin ka nahimutang karon,” ug mituman kini kaniya. Wala siya misalig sa iyang kaugalingong salabutan. Apan misalig siya sa saad sa Dios, “Gihatag Ko na kaninyo kanang yuta; lakaw angkona kini.”

<sup>151</sup> Iya nang gihatag kaninyo ang saad nga Espiritu Santo. Maangkon mo Kini dinhi niining kombensyon. Imo nang maangkon Kini karon.

<sup>152</sup> Ayaw pagsalig ngadto sa, “Abe ninyo, gikapoy na ako. Sultihan ko kamo, mikaon na ako ug daghan kaayong panihapon. Akong—akong—akong dili gusto kang Juan nga makita ako nga nagabuhat niini.” Oh, naunsa man! Nagasalig man ka sa imong kaugalingong salabutan.

<sup>153</sup> “Ang saad alang kaninyo, ug sa mga anak sa inyong mga anak, ngadto kanila nga atua sa halayo, bisan pa sa kadaghan nga pagatawgon sa Ginoo nga atong Dios.”

<sup>154</sup> “Ang doktor nag-ingon nga mamatay na ako. Iya akong gisusi, ug miingon anaa ko’y niining kanser, anaa ko’y niini, o unsa man kini. Mamatay na gayud ako.” Ayaw pagsalig diha nianang maong salabutan. Ang Dios mao ang Ginoo nga imong Dios Kinsa mao’y nagaayo sa tanan mong mga balatian. Busa ayaw pagsalig diha nianang salabutan, dili sa tawhanong salabutan. Salig sa salabutan sa Dios.

<sup>155</sup> Unsa na man ang bahin kang Samson, didto sa kapatagan, sa dihang ang mga Filistihanon, ang usa ka libong kalalakenan migukod kaniya? Ug didto siya nga nagabarug didto, gamay kaayong, kulongon ug buhok nga gamayon’g tawo, mga ingon *niana* ang gitas-on. Dili siya; bueno, dili siya eskrimador, tungod kay dili siya kahibalo; wala siya’y pamansay, sinundalong pamansay. Usa lamang siya kaniadto ka gamay nga babayenhong kulongon ug buhok, susama sa, nga adunay pito ka binugkos nga buhok nga nagadunghoy, batang mamamahon, nga nagatindog didto, ug ania karon ang usa ka libo nga mga Filistihanon. Bueno, wala siya’y bisan unsa diha sa iyang kamot. Miduko siya, ug nakakita siya ug usa ka karaang namuti nang, puting bukog nga apapangig sa mula, ug iyang gipunit kini.

<sup>156</sup> Karon miingon, “Atong tan-awon, karon, dili ko kaayo magamit *kini*, tungod kay silang mga puthaw’ng sarok sa ilang ulo . . . Silang nga Filistihanon, silang tanan mga sundalo, anaay ilang mga bangkaw. Silang tanan adunay kotamaya. Ug ang ilang mga puthaw’ng sarok nagatimbang ug mga napulo’g lima ka libras kada usa, tag-as ug dagkung mga tawo, tanan didto. Bueno, kung aduna may akong maigo niining karaang gabokon nga bukog nga apapangig sa mula, diha sa usa kanilang mga puthaw’g sarok, aba, madugmok kini. Mao gyud kana?”

<sup>157</sup> Wala siya misalig sa iyang salabutan. Iya lang gidawat kung unsa man ang atua sa iyang kamot, ug gisugdan ang pagpangbunal sa mga Filistihanon. Ug human nga iya nang nabuntog ang usa ka libo kanila, anaa pa kaniya sa gihapon ang bukog nga apapangig sa iyang kamot. Amen.

158 Dili ko igsapayan kung unsa may ginaingon sa teolohiya sa tawo, ayaw pagsalig diha niana. Salig ngadto sa pulong sa Dios, “Si Jesus Cristo mao sa gihapon kagahapon, karon, ug hangtud sa kahangturan.” Sigurado, gitoohan niya kini.

159 Unsa kaha kung si David nagpatalinghug ngadto kang Sams- . . . Sa teolohiya ni Saul? Atua didto si Goliat nagtindog uban sa iyang dagkung pagpangandak, ug ang tanang tawo nalisang na; Si Saul, nga mao ang kinalabwan sa tanan nga mga kasundalohan. Miingon si Goliat, “Ang si bisan kinsa gumawas ug pagpakig-away kanako. Dili na kinahanglan nga— nga mangamatay kitang tanan. Kung mapatay ko ikaw, nan mangalagad kamong tanan kanamo. Ug kung mapatay ko nimo, aba, moalagad kami kaninyo,” tungod kay nakabintaha man siya kaniya. Ingon niana ang gustong buhaton sa yawa, sa dihang nahipagawas na niya ang tibuok niyang seminaryo, ug silang tanan, sa dihang nagapakig-uban na siya, kita n’yo.

160 Ang gamay’ng si David atua nagalakawlakaw didto, nagasul-ob siya ug usa ka panit sa karnero; mapulapula, hoyhoyon ang abaga, usa ka gamayo’ng lalaki nga mga usa ka gatus ka libras, mga usa ka gatus ug napulo. Matud niya, “Ang inyo bang ipasabot kanako nga ang mga kasundalohan sa buhing Dios, nga na-sirkunsisyonahan na ngadto sa pakigsaad, magatindog diha ug tugotan nga kanang dili-tuli nga Filistihanon maghagit sa mga kasundalohan sa buhing Dios?”

161 Miingon si Saul, “Duol ngari, bata.” Matud niya, “Ginadayeg ko ang imong kaisog, apan ang mga adlaw sa mga milagro milabay na. Wala na kita’y mga ingon nianang butanga sama niana, kita mo. Ug suginlan ko ikaw sa usa ka butang, unsa man nga kard sa pagpakigkauban ang imong ikapakita, kita mo? Wala gani kay hinagiban. Wala gyud kay imo gawas nianang lamboyog sa imong kamot. Kita mo? Wala ka makabaton ug Ph.D. o LL.D. Unsaon mo man sa pagbuhat niini? Aba, kanang tawhana usa ka manggugubat. Aba, usa siya—usa siya ka D.D., doble ang L, Ph.D., LL.Q. Aba, anaa kaniya ang daghang mga titulo, mahimo niyang lukopon ang bongbong niini. Ug si kinsa ka ba? Usa ka magbalantay sa karnero.”

162 Miingon siya, “Apan buot kong sultihan ikaw sa usa ka butang.” Matud niya, “Nasayod ka ba’g unsa?” Miingon, “Nagabantay ako kaniadto sa panon sa karnero sa akong amahan didto, ug,” matud pa, “usa ka leon ang mitungha ug gitangag ang usa kanila, ug midagan. Ug nahibalo ka, gikuha ko kining gamay’ng lamboyog ug gigukod siya, ug gitumba siya. Akong gikuha ang—ang nating karnero sa iyang baba, ug mibangon siya batok kanako sa dihang gibuhat ko. Gikuha ko lang ang kutsilyo ug gipatay siya.” Miingon, “Miadto ko balik. Ug ania karon ang usa ka oso nga nagsulod, nagagukod sa karnero, ug gisakmit siya ug midagan pagawas. Ako siyang

gipatay, usab.” Miingon siya, “Karon ang Dios . . . Dili sa akong Ph.D., dili sa akong kaugalingong salabutan. Dili ko masulti kanimo kon ginaunsa ko sa pagbuhat niini. Wala ako mahibalo kung giunsa kini pagbuhat. Apan ang maong Dios,” amen, “ang Dios nga nagpalingkawas kanako gikan sa kuyamoy sa oso ug sa leon, unsa ka labaw pa nga ipalingkawas Niya ako gikan sa mga kamot nianang dili-tuli nga Filistihanon!”

<sup>163</sup> Ang obispo, si Saul, miingon, “Abi nimo, nagatoo ako nga aduna ka’y pagkatinawag, bata. Sultihan ko ikaw, kung moduol ka diri, tudloan ko ikaw kung unsaon sa pagpakigsangka, kita mo. Ug sultihan ko ikaw, ako—ako man ang doktor, busa isul-ob mo ang akong hinagiban. Gusto ko ikaw’ng sul-oban.” Mitindog si David didto, ug gihatagan nila siya ug Ph.D., usa ka LL.D., ug kadtong tanan na, ug—ug ang maong kabus nga gamay’ng lalaki dili na gani makalihok. Dili na siya makahibalo kung unsaon.

<sup>164</sup> Miingon siya, “Wala ko pa gayud kini mapamatud-i. Kanang pang-iglesiahanonng bisti dili nagasibo kanako. Kuhaa ang maong butang. Pasagdi ko sa paglakaw uban sa kon unsa may gitabang kanako sa Dios.” Kadto mao ang pagtoo sa gahum sa Dios. Ug siya—wala siya nagsalig sa iyang kaugalingong salabutan. Wala siya nagsalig sa kon unsa ang giingon ni kinsa pa man. Misalig siya ngadto sa pagtoo. Tungod kay, nahibalo siya nga kon ang Dios nagluwas kaniya gikan sa kuyamoy sa oso, unsa ka labaw pa nga Iyang luwason siya gikan nianang Filistihanon!

<sup>165</sup> Bueno, kon ang Dios nahigugma man kaayo kaninyo sa igo aron ihaw-as kamo gikan sa sala ug aron pun-on kamo sa Espiritu Santo, unsa na may nahitabo kaninyong mga tawong mahuyang wala’y dugokan’g luyat nga ania sa nasud, dili ba labaw pa Siyang mopalingkawas kaninyo gikan sa inyong kasakitan sa dihang gisaad Niyang buhaton kini? Ang Pulong sa Dios nagsulti sa ingon. Buhaton Niya kini. Sigurado, Iya siyang gipalingkawas gikan sa maong kamot.

<sup>166</sup> Oh, ang matag usa sa mga propeta, unsa kaha kon misalig sila ngadto sa ilang kaugalingong salabutan sa ilang panahon? Wala gayud unta sila nakaduol ngadto kanilang mga pari ug sa mga labaw’ng pari, ug gitawag silang “pinaputi nga mga bongbong” ug tanang butang pa. Wala gayud sila unta nanagna nga supak kanila. Nangahimo na unta silang sama kanilang pipila nga mga modernong propeta, nga nahiuyon na unta, nanagsul-ob ug maayong mga bisti, ug didto na sa mga palasyo sa mga hari.

<sup>167</sup> Unsa kaha kung si Juan misulay sa pagsalig sa iyang kaugalingong salabutan? Apan siya miadto mismo.

<sup>168</sup> Miingon sila, “Karon, paghulat sa makadiyut, Juan, ayaw gayud pagwali ug *Panagminyo Ug Panagbulag.*”



169 Miadto siya mismo sa lugar ni Herodes, ug miingon siya, “Dili uyon sa balaod alang kanimo ang paghupot kaniya.” Oo, sir.

Moingon, “Bueno, nahibalo ka ba kon kinsa kana? Mao kana ang prok- . . .”

“Dili ko igsapayan kung kinsa kini.” Wala siya misalig.

170 Miingon, “Karon nahibalo ka nga wala kay ikasarang. Ania ka ra dinhi niining kamingawan. Ang kapunongan dili modawat kanimo, kung ikaw mogawi ingon niana.” Wala siya magpakabana bahin sa unsa mang kapunongan. Wala siya misalig sa iyang kaugalingong salabutan, kondili ngadto sa salabutan sa Dios. Sigurado.

171 Dihay usa ka tawo nga misalig gyud sa iyang kaugalingong salabutan, ug ang iyang ngalan mao si Judas Iscariote. Oh, siya . . . Dili ko—ko makita kung giunsa niya pagbuhat niini. Siya nakiglakaw nawong sa nawong uban kang Cristo, sama sa gibuhat ni Eva sa sinugdan. Iyang nakita ang pagpanghimatuod, iyang nalantaw ang Dios diha sa nawong, sama sa gibuhat ni Eva diha sa kabugnaw sa kagabhion. Si Eva nakalantaw kang Cristo, diha sa kabugnaw sa kagabhion, sa maong tanaman. Ug si Judas nakapanglingkod diha sa kabugnaw sa kagabhion, sa tanaman sa Getsemane ug sa daghang mga dapit, ug nakalantaw sa mao ra gihapong Cristo; nakadungog Kaniya nga nagapanudlo, nagapanghimatuod sa Iyang Kaugalingon pinaagi sa Pulong, gipanghimatud-an nga mao ang Propeta nga gihisgotan ni Moises nga patindogon. Ug gisultihan sila diha sa Kasulatan kung Kinsa Siya, ug sa tanang bahin niini. Nakita nila kining gipamatud-an sa Dios, nga mao Siya, ug unya misalig siya ngadto sa iyang kaugalingong salabutan.

172 Uh! Mahimo ba niya kini? Kadto tungod kay wala gayud siya niini sa sulod dinhi, sa sugod pa lang. Dili siya usa ka gi-germitize nga binhi. Siya mao ang anak sa kalaglagan, gihimugso gikan sa kalaglagan, mibalik ngadto sa kalaglagan. Karon atong namatikdan. Apan migawas siya, ug tingali’g adunay iyang pangagpas sa iyang pagpanabot. Tingali’g nagdahum siya nga si Jesus. . . Hilabihan ang iyang pagtahud alang Kaniya, “Karon, nasayod ka, tingali’g ako Siyang ibaligya sa katloan ka buok nga salapi. Ug kung buhaton ko, magkaaduna na ako’y mga salapi, ug makabuhat na ako ug butang pinaagi niana. Ug mahimo man Niya ang pagluwas sa Iyang Kaugalingon.” Kita n’yo, wala siya mahibalo, diha sa Kasulatan, nga gipatungha siya aron mao’y mobuhat nianang mao rang bahin.

173 Ug wala ni ang mga tawo karon nakaila kung unsa na ang kahimtang nga diin ania sila. Gikatagana na kini alang niining iglesia sa Laodicea nga ma-niining maong kahimtanga, ginapahimutang si Cristo diha sa gawas. Ug

Siya nga nagapanoktok, nagapaninguha sa pagsulod balik. [Nagapanoktok si Igsoong Branham diha sa pulpito—Ed.] Wala'y pagtambayayong bisa'g asa, bisan pa man. Nagapanghimatuod sa Iyang Pulong sa maong panahon karon, sama sa Iyang gibuhat sa matag panahon, ug sila nga nagapahilayo mismo gikan niini. Nagasalig ngadto sa ilang kaugalingong salabutan, mao—mao man lang kanang tanan ang anaa niini.

<sup>174</sup> O, tingali'g, ingnon nato kini nga—nga naghunahuna siya. Tingali kung iya nang nabaligya si Cristo sa katloan ka buok nga salapi, aba, niana magkaaduna na siya'y usa—usa ka pagpakig-ambitay uban sa pipila ka dagkung mga denominasyon niadtong panahona, ang mga Fariseo ug mga Saduceo. Moingon siya, “Karon paghulat, maatimanan Niya ang Iyang Kaugalingon. Ako na Siyang nakita sa dagkung panggubatan; ako—ako nasayod nga—nga mahimo Niya ang pag-atiman sa Iyang Kaugalingon. Busa makapangkwarda ako tingali ug pipila, ingon ug usa ka—usa ka gamay'ng pagretiro, maingon kaniadto. Ug unya, usab, tingali'g magkaaduna ako'y dakung dungog niining mga kasimbahanan karon, kung akong ibaligya Siya ngadto kanila.” Kita n'yo? Apan misalig siya sa iyang kaugalingong salabutan, imbis sa salabutan nga kadto mao ang gipamatud-an nga Pulong sa Dios, ug iyang gibuhat ngadto kang Jesus kung unsa gayud ang giingon sa mga Kasulatan nga iyang pagabuhaton.

<sup>175</sup> Ug, karon, ang kaiglesihanang kalibutan nagpahigawas kang Cristo niining katapusang mga adlaw, tukma gayud sa giingon sa Libro sa Pinadayag nga ilang buhaton kini. Espiritu usab kini ni Judas, diha sa porma nga iglesia, “Nga nagabaton ug dagway sa tinoohan, apan nagapanghimakak sa Pulong.” Kita n'yo? Husto kana. Karon, Oh, sus, unsa man ang gisangpotan niini? Kamatayon, sama sa gibuhat niini kang Eva. Ug ginabuhat kini sa tanang uban pa nga nagasuway sa pagtuis sa Pulong sa Dios ug nagasalig sa ilang kaugalingong salabutan. Bisan gani karon ilang ginabaligya, dili sa katloan ka buok nga salapi, apan tingali'g mamahimong, oh, usa ka dakung opisyal, pipila ka pang-seminaryo nga kasinatian. Dili gani mokantidad ug katloan ka buok nga salapi, apan bisan pa ila kining ginabaligya; ginabaligya ang ilang pagpanabot bahin sa Dios, ginabaligya, alang sa ingon nianang butanga.

<sup>176</sup> Daw sa unsa kalahi kaysa daghang nakat-onan nga si San Pablo, kinsa adunay tanan nang kahibalo nga mahimo niyang ipagpanghambog. Apan miingon siya, “Ako nang gisalikway ang maong tanang butang, ang akong mga pagpangatarungan, ginasalikway. Akong gikahibalag ang Haligi nga Kalayo usa niana ka adlaw, diha sa dalan padulong sa Damascus.” Ug miingon siya, “Wala gayud ako moanha kaninyo uban sa hinashasan nga mga pulong, tungod, kay kung gibuhat ko man, mosalig na man kamo sa kaalam sa tawo. Apan nagaanha ako

kaninyo pinaagi sa gahum ug sa mga pagpasundayag sa Espiritu Santo, aron kamo—kamo mosalig diha sa Pulong sa Dios.” Amen. Nag-ingon, “Kung ang usa ka Manulonda gikan sa Langit motungha, nga magawali ug lain pang butang, ipatunglo siya,” Mga Taga-Galacia 1:8. Husto kana. Dili, Sir. Wala gyud niya.

<sup>177</sup> Ang usa ka gamay’ng babaye sa atabay, usa siya ka mananapaw. Apan nahibalo siya nga gitiwalag siya sa mga kasimbahanan. Ug, apan wala gayud siya misalig sa iyang kaugalingong salabutan. Sa dihang iyang gikahibalag kining Usa diha sa atabay, kinsa mitug-an kaniya sa tanang mga sala nga iyang nabuhat, siya midalagan ngadto sa siyudad. Karon dili kadto husto alang sa usa ka babaye ang pagbuhat niana, ang pagsulod ug pagsulti’g bisan unsang butang, tungod kay usa siya ka bigaon. Apan sa dihang gikahibalag niya si Jesus, wala gayud siya misalig ngadto sa salabutan sa mga tawo, sa ilang mga adlaw. Miadto siya, miingon, “Umari kamo, tan-awa ang Tawo Kinsa mitug-an kanako sa mga butang nga akong nabuhat. Dili ba kini na gayud ang Mesias?” Wala gayud siya misalig diha sa iyang salabutan. Wala.

<sup>178</sup> Ang dalagang ulay nga si Maria, sa dihang gikahibalag siya sa Manulonda nga si Gabriel ug gisultihan siya nga manganak siya ug usa ka bata, nga wala may bana. Whew! Wala pa gayud sukad. Wala gayud siya misalig sa iyang kaugalingong salabutan, nga ang usa ka babaye dili makaanak ug usa ka bata nga wala’y usa ka—usa ka bana. Wala siya misalig diha niana. Apan miingon siya, “Ania ang ulipon sa Ginoo, matuman unta kini kanako sumala sa Imong Pulong.” Wala siya miingon, “Unsaon man nako pagbuhat niini? Ug kanus-a ko man kini buhaton? Ug unsaon man niining tanan sa pagkatuman?”

<sup>179</sup> Ang Manulonda miingon, “Pagalandongan ka sa Espiritu Santo; ug kanang maong Balaang Butang nga matawo kanimo pagatawgon nga mao ang Anak sa Dios.”

<sup>180</sup> Siya miingon, “Ania ang ulipon sa Ginoo.” Wala siya migamit sa iyang pagpangatarungan, ingnon nga dili kini mahimo. Miingon lamang siya, “Ania ang ulipon sa Ginoo.” Husto kana. Timan-i.

<sup>181</sup> Ang—ang babaye nga gitalinug-an, ang doktor miingon kaniya, miingon, “Wala na’y paglaum.” Nagasto na niya ang tanan niyang katigayonan, sa mga mananambal, ug wala kanila’y makatabang kaniya. Ug wala siya misalig diha niana. Sa dihang si Jesus . . . Milakaw siya latas sa panon sa mga tawo, ug miingon siya, “Nagatoo ako nga kung mahikap ko lang ang bisti nianang Tawhana, mamaayo gayud ako.” Nagapadayon siya ngadto.

<sup>182</sup> “Paghulat karon, matud sa doktor, ‘Dili ka na mamaayo pa.’” Anaa na kaniya kining talinugo sa daghang mga katuigan. Mas nagkaluya pa siya sa kanunay, ug nagsamot pa. Gibiyaan na

siya sa mga doktor. Hangtud mao lang kana ang salabutan nga anaa kanila.

<sup>183</sup> Apan miingon siya, pinaagi sa pagtoo! Wala’y Kasulatan nga nagasulti kaniya sa pagbuhat niana. Apan miingon siya, “Kung mahikap ko lang ang sidsid sa Iyang bisti, mamaayo gayud ako,” ug misaliut siya ug gihikap Siya. Mibalik siya, nga milingkod.

<sup>184</sup> Milingi si Jesus ug miingon, “Kinsa’y mihikap Kanako?” Minanaw sa palibot hangtud nga Iya siyang nakita. Gisultihan Niya siya sa iyang talinugo.

<sup>185</sup> Ug iyang gibati niadtong higayona, sa iya mismong lawas. Dili niya kini mapamatud-an dayon, apan iyang gibati sa iya mismong lawas nga mitang-on ang iyang talinugo. Wala gayud siya nangatarungan, “Kon ang doktor misalikway na kaniya, unsaon na man sa bisan unsang butang ang pagtabang kaniya?” Wala gayud siya midangup sa pagpangatarungan, apan midangup siya ngadto sa pagtoo.

<sup>186</sup> Karon ang Biblia nag-ingon, “Nga Siya mao ang Labaw’ng Sacerdote, karon, nga mobati sa pagkaluoy sa atong mga kaluyahon.” Husto ba kana? [Ang kongregasyon nagaingon, “Amen.”—Ed.]

Ayaw pagdangup ngadto sa pangatarungan, nagaingon, “oh, kana’y . . .”

Siya miingon, “Mao kana Siya sa pagkakaran. Siya karon mao ang Labaw’ng Sacerdote nga mobati sa pagkaluoy sa atong mga kaluyahon. Ang mao sa gihapon kagahapon, karon, ug hangtud sa kahangturan!”

<sup>187</sup> Unsa may inyong hunahunaon sa dihang didto pa ako ingon nga magwawali sa Baptist, ug kadtong Manulonda sa Ginoo mitagbo kanako didto ug nagsugo kanako sa pag-adto ug buhaton kining akong ginabuhat karon? Aba, ang pastor ko miingon, “Nabuang ka na. Aba, gidaman man ka, ikaw.”

Matud ko, “Maayo pang kuhaon mo na ang akong kard sa pagpakigkauban karon mismo.”

<sup>188</sup> Karon, matud niya, “Unsaon man nimo sa pagkahimo, nga wala man lang gani ug edukasyon sa usa ka tulonghaan sa gramatika, mowali sa tibuok kalibutan? Unsaon man nimo gayud sa pagpangampo sa mga hari ug mga gamhanan, ug ikaw—ikaw—ikaw nga dili gani makagamit sa imong gramatika sa husto?”

<sup>189</sup> Wala ako misalig sa akong gramatika. Wala ako misalig sa bisan unsang kahanas nga ania kanako. Sinugo ako. Aleluya! Ug wala ako midangup ngadto sa mga pagpangatarungan. Kung nagpatalinghug pa ako sa mga pagpangatarungan, tingali’g aduna na’y linibo unta ka katawhan ang nangamatay, sa mga katuigan nga milabay. Apan akong gidala ang Mensahe sa tukma gayud sama sa Iyang giingon, palibot ug palibot sa kalibutan.

<sup>190</sup> Ug ako moadto usab, pinaagi sa grasya sa Dios; dili pinaagi sa mga pagpangatarungan, kondili pinaagi sa sugo. Aleluya. Wala ako misalig. . . Moingon ka, “Kalim-an ug lima ka na ka tuig ang panuigon.” Kung ako man kasiyam na ug lima ang kaguwangan, wala kana’y kabilinggan. Siya ang mao sa gihapon nga Dios nga Siya kaniadto mao kang Abraham. Oo, sir. Ayaw pagsalig sa inyong kaugalingong mga salabutan.

<sup>191</sup> Ug human nga ang ilhanan nahipadayag na, ug ang maong Tingog nga nagasunod, ug ang mga kasimbahanan misugod na pagsalikway kanako ug gisirhan ang ilang mga pultahan, tungod sa Doktrina, nga bisan kinsa kanila dili makapangahas sa pagbarug sa akong atubangan aron ingnon nga Kini husto o sayup man. Akong ginahagit ang si bisan kinsa kanila. Uh-huh. Dili aron mamahimong maalamon, apan nahibalo ko kung hain gayud ako. Husto kana. Unsay ilang gibuhat? Unsa may ilang gibuhat? Ilang gisirhan ang matag pultahan. “Karon unsa na may imong buhaton?”

<sup>192</sup> Sa miaging adlaw, ibabaw sa bukid, didto ako nagatindog niadto. Matud ko, “Ginoo, adunay usa pa ka pultahan ang bukas alang kanako sa tibuk nasud, sumala sa akong nahibaloan, mao kang Phoenix, Arizona. Ang bugtong usa nga aduna ako.” Ug misugod ko panaug sa bukid. Sa ingon ka klaro nga ako gayud nadungog ang si kinsa man nga nagasulti, nag-ingon, “Unsa kana alang kanimo? Sunod ka Kanako.” Kon ingon-ana, dili diha sa akong kaugalingong salabutan. Mosalig ako diha sa Iyang saad.

<sup>193</sup> Oh, higala, ayaw pagsalig diha sa mga pagpangatarungan. Dayon imong isinggit, uban kang Eddie Perronet kaniadto:

Tanan maghimaya sa gahum sa Ngalan ni  
Jesus!  
Ang mga Anghel mangyukbo ug manghapa;  
Ipagawas ang harianong purong-purong,  
Ug purong-purongan Siya ang Ginoo sa tanan;  
Purong-purongan Siya ang Ginoo sa tanan.

<sup>194</sup> Husto kana. Ayaw pagsalig sa kon unsa may imong ginahunahuna, kon unsay gihunahuna sa uban pa. Pinaagi sa pagtoo dawata ang saad sa Dios. Buhaton ba ninyo kini? Karon dili kini ingon sa kung gibuhat ba kini sa uban pa, o dili ba nila kini gibuhat, apan unsa na man ang bahin kanimo? Unsa may imong buhaton niining Jesus nga gitawag ug Cristo, nga nagapadayag sa Iyang Kaugalingon niining adlaw, sama sa Iyang gibuhat niadtong adlaw? Nagatoo ba kamo Kaniya? [Ang kongregasyon nagaingon, “Amen.”—Ed.]

Mag-ampo kita.

<sup>195</sup> Ginoong Jesus. Hari sa mga hari, Ginoo sa mga ginoo, Dios sa mga dios, Dios sa tanang mga gamhanan; ang Nahauna, ang Nahaulahi; ang Alfa; Omega; ang Sinugdanan ug ang

Katapusan; ang Masidlak ug Bitoon sa Kabuntagon, ang Rosa sa Sharon, ang Lirio sa Kawalogan, ang Gamut ug Kaliwat ni David; umari Ka, Ginoong Dios, ang mao sa gihapon kagahapon, karon, ug hangtud sa kahangturan!

<sup>196</sup> Panalangini kining maong panon sa katawhan, Ginoo. Kining... [Blangko nga bahin sa teyp—Ed.] nagapangandam lang aron sa pagsugod ugma. Adunay among gamay'ng tigum dinhi, ug Imong gipanalinganan kami niini. Imong gipadayag ang Imong Kaugalingon kanamo. Ako nagaampo, Dios, nga imong ipadayon ang pagpadayag sa Imong Kaugalingon kanamo. Panalangini kami niining gabhiona. Tabangi kami karon. Mga nagkinahanglan kami nga katawhan.

<sup>197</sup> Ug, Ginoo, nahibalo Ka nga dili ko gusto mangsaway ug mga tawo, apan unsaon ko man pagpahilum nianang balaang pagdilaab? Dili ko buot buhaton kana, Ginoo. Nahibalo Ka sa akong kinabuhi, sa akong kasingkasing. Kinahanglan buhaton ko kini. Ug nagaampo ako, Dios, nga Imo akong tabangan sa pagbuhat niini. Hatagi lang ako ug grasya, ug ayaw gayud itugot kanako nga mosalig sa kaugalingon kong salabutan, apan tugoti ako sa pagsalig diha sa Imong saad. Sa Ngalan ni Jesus. Amen.

<sup>198</sup> Buot ko kaninyo, ang matag usa, nga mahimong matinahuron gayud sa pipila lang ka gutlo. Dinhi niining duot sa katawhan, aniyang mga babaye ug mga lalaki nga nagalingkod dinhi, nga sa wala'y duhaduha, kinsa nga masakiton. Pila man ang adunay balatian ug nag-antos dinhi, itaas ang inyong mga kamot, ingna lang, "Nagkinahanglan ako sa Dios"? Itaas lang ang inyong mga kamot karon mismo, "Nagkinahanglan ako sa Dios."

<sup>199</sup> Karon, wala ako nakaila sa daghang mga tawo. Nakaila ako niining tulo ka mga batan-ong lalaki nga nagalingkod mismo dinhi. Nakaila ako kang Mr. Dauch ug sa iyang asawa nga nagalingkod diha. Nagtoo ko, nagtoo ako nga si igsoon nga babayeng Moore kini. Dili ako makasiguro. Husto ba kana, Igsoong Moore? Gawas niana, siguro mao na kana, kang Igsoong Mike ug sa entablado. Kana kutob sa, ingon sa akong makita, nga akong nailhan.

<sup>200</sup> Apan ang Langitnong Amahan Kinsa mao'y nagsaad, ug niining adlawa Iyang pamatud-an ang Iyang Kaugalingon niining panahona, sa tukmang pamaagi nga Iyang gibuhay sa Sodoma. Nagsaad ba Siya niini? [Ang kongregasyon nagaingon, "Amen."—Ed.] Ipadayag ang Iyang Kaugalingon! Nagatoo ba kamo niana? ["Amen."]

<sup>201</sup> Karon kung inyong iampo, ug pinaagi sa pagtoo! Karon ayaw pagpangatarungan, "Unsaon man nako sa paghikap Kaniya ingon nga Labaw'ng Sacerdote?"

<sup>202</sup> Karon, ang Biblia nag-ingon, ang Bag-ong Tugon, "Siya ang Labaw'ng Sacerdote mismo karon. Iyang ginapadayon ang

pagka-Labaw'ng Sacerdote sumala sa laray ni Melquisedec. Siya mao ang Labaw'ng Sacerdote hangtud sa kahangturan. Wala na'y lain pang Labaw'ng Sacerdote kondili Siya. Wala na'y lain pang tigpataliwala sa Dios ug sa mga tawo, kondili ang maong Tawo nga si Cristo." Husto kana. Siya mao lamang ang Bugtong, ug Siya mao sa gihapon kagahapon, karon, ug hangtud sa kahangturan.

<sup>203</sup> Karon kung Siya nagapabilin nga kanang mao ra sa gihapon nga Labaw'ng Sacerdote, ug ang Biblia nag-ingon, "Ato Siyang mahikap pinaagi sa maong pagbati sa kaluoy sa atong mga kaluyahan," sama sa gibuhat niadtong gamay'ng babaye nga mihikap sa Iyang bisti, ang inyong pagtoo makahimo sa paghikap Kaniya niining gabhiona ug Siya magapamuhat sa mao gihapong pamaagi, sa tawhanong unod, sama sa iyang gibuhat sa dihang atua pa Siya sa tawhanong unod didto sa—sa kahoy'ng tugas ni Abraham. Nagatoo ba kamo niana? [Ang kongregasyon nagaingon, "Amen."—Ed.] Iyang gisaad nga Iyang buhaton kini. Karon pag-ampo lamang, ang si bisan kinsa nga adunay panginahanglan. Ug ako—ako . . .

<sup>204</sup> Sama kini sa akong gikaingon, ang gasa dili usa ka butang nga sama sa daw nagakuha ka ug kutsilyo, ug kung gusto mong putlon *kini* niini, mahimo mo ang pagputol niini; o kaha putlon mo *kini*, mahimo mong maputol kini, o bisan unsa pay buot mong buhaton. Dili ingon-ana ang gasa sa Dios. Kita n'yo? Dili.

<sup>205</sup> Ang gasa sa Dios mao'y usa ka pamaagi nga aduna kanimo ang pagpadaplin sa imong kaugalingon. Ug ang mga gasa ug mga pagtawag mao'y pagpanghibuot nang daan sa Dios. "Ang mga gasa ug mga pagtawag wala na gani pagkabakwi." Nahimugso ka uban niini. Usa ka gamay'ng kambiyada nga imong ginakambyo sa imong kaugalingon, apan dili ka makatukod sa sikaranan. Kita n'yo? Ang Dios mao'y kinahanglan mopaandar niini. Imo kinahanglan ipadaplin ang imong kaugalingon.

<sup>206</sup> Ang imong pagtoo mao'y makapalihok niini, dili ang sa ako; ang sa imo. Ang sa ako mao'y magpadaplin lang siya. Toohi sa imong tibuok kasingkasing nga si Jesus Cristo buhi karon.

<sup>207</sup> Ayaw pagsalig sa kaugalingon mong salabutan, nagaingon ka, "Bueno, karon tan-awa, ania ako—ako sa talandugon nga kahintang, igsoon. Wala ka makaila kanako. Sukad pa ania na ako niining lingkuranang may-ligid. Dugay na ako . . ."

<sup>208</sup> Dili ko igsapayan kung unsa ka sukad pa, ug tan-awa kung ang Dios dili ba monaug ug buhaton sa tukma gayud sama sa Iyang gibuhat sa dinhi pa Siya sa yuta diha sa usa ka pisikal nga lawas. Iyang pagabuhaton kini diha sa inyong lawas, sa akong lawas, nga nagkahiusa ingon nga usa ka pundok nga nagatoo Kaniya. Iyang pagabuhaton kini tungod kay Siya nagsaad man nga Iyang buhaton kini.

209 Karon ayaw pagsalig sa kon unsa may ginaingon ni kinsa, “Oh, kana—kana’y telepatiya ra sa pangisip,” nga ilang ginatawag Niini. Giingon nga si Jesus mao gihapon. Miingon sila nga Siya usa ka manghihimalad, “usa ka yawa.” Apan Siya mao ang Anak sa Dios, tungod kay Siya mao’y sumala sa gisaad nga Pulong sa Dios.

210 Karon, sa gikaingon ko na, ang atong—ang atong mga pwesto, dili kita kinahanglan nga magkaanaa niana, sa pagduol ug pagpandong ug mga kamot sa mga tawo. Nagpandong na kita ug mga kamot diha kanila kagabii. Apan ang butong butang nga kinahangalan maanaa kanimo mao ang pagtoo, ug dayton ilha. Pinaagi sa pagtoo ginadawat mo kini, pinaagi sa pagtoo. Dili—dili pinaagi sa bisan unsang butang nga . . .

Ayaw pag-ingon, “Bueno, unsaon man niini pagkahimo?”

211 Kung masulti ko kaninyo kon giunsa kini pagbuhat, nan dili na kini pagtoo. Wala ako mahibalo kung giunsa kini pagbuhat. Wala ako mahibalo, apan akong ginatoohan kini. Wala ako—wala ako mahibalo kon ginaunsa—ginaunsa sa Dios ang pagluwas sa usa ka makasasala, apan Iya kining ginabuhat. Wala ako masayod kon ginaunsa sa Dios ang pagbuhat sa bisan unsa niining mga butanga, apan akong ginadawat kini. Siya, Siya ang nagabuhat niini, ug mao kana ang pamaagi. Tungod kay, dili ko kini masaysay. Karon, bueno, ako . . . Dili gayud mahimong isaysay. Wala’y usa nga makahimo. Tungod kay, kung mahimo mo man, nan dili na kini pagtoo.

212 Dili ko makita kung giunsa nga ang Dios ug si Cristo mahimong mao ra nga Persona, apan mao ra Sila. Ang Kasulatan nag-ingon. Bueno, dili mo mahimong isaysay kini, apan, mao ra Sila. “Ang Akong Amahan ania Kanako. Dili Ako ang nagabuhat sa maong mga buhat; ang Akong Amahan nga ania Kanako. Kung dili Ko ginabuhat ang Iyang mga buhat, nan kana nagapakita nga Ako dili Iya. Apan kung ginabuhat Ko ang Iyang mga buhat, nan Siya nagapanghimatuod sa Iyang Kaugalingon nga Ako Iya.”

213 Bueno, mao rang butanga kini karon, sa tukma ang mao sa gihapong butang. Siya mao gihapon kagahapon, karon, ug hangtud sa kahangturan, kon inyong toohan.

214 Karon aniy usa ka tawo nga nagalingkod mismo dinhi sa akong atubangan, itum ang iyang buhok. Adunay orasan sa iyang bukton; itum ang terno. Nagasul-ob siya ug antiyohos. Kung makalantaw kamo mismo dinhi, inyo siyang makita nga nagalingkod nga piniyong ang iyang mga mata, nagaampo. Wala ako makaila nianang tawhana. Ang Langitnong Amahan nasayod nga wala ako nakaila kaniya. Apan tan-awon ko lang siya sa pipila ka gutlo, tungod kay daw sa matinud-anon siya kaayong tan-awon, nga nagalingkod diha. Sukad gayud nga akong gihisgotan, ang maong lalaki nagpiyong lang sa iyang



mga mata ug misugod sa pag-ampo. Ang maong tawo alang kanako dili ko igkaila, mao kana'y, sa akong mga kamot. Wala ako makaila kaniya. Nakaila ang Dios nianang tawhana, ug mahimo Niyang ipadayag kanako. Kung kanang saad matuod sa Biblia, Iyang mahipadayag kanako kung alang sa unsa man ang gipiyong nianang tawhana sa iyang mga mata, ug bahin sa kon unsa man ang iyang ginaampo. Nagatoo ba kamo niana? [Ang kongregasyon nagaingon, "Amen."—Ed.]

<sup>215</sup> Nagatoo ka ba niini, sir? Kung imong ibuka ang imong mga mata, ania ka nagalingkod mismo dinhi, nagatan-aw mismo dinhi. Nagatoo ka ba niana? Sige. Karon nahibalo ka nga wala ako makaila kanimo. Wala kita nakaila sa usa'g usa. Apan ang Dios nakaila kanimo. Karon misugod na siya sa paghilak, nagabakho. Tungod kay, mahimo ko nang itug-an kaniya karon nga tubagon sa Dios ang iyang hangyo, kita n'yo, tungod kay mao kana'y mipabati kaniya dili pa lang dugay, nianang maong Kahayag; gikan sa kangitngit, gibalhin ngadto sa Kahayag. Kita n'yo?

<sup>216</sup> Karon, ang maong tawo, nagaampo siya alang sa uban pa, ug kana mao kining gamay'ng batang lalake nga nagalingkod dinhi nga duol kaniya. Iya kanang anak nga lalaki. Husto kana. Karon, kanang batang lalaki nagaantos sa usa—usa ka balatian sa tiyan, ug usab adunay daut sa iyang mga tinai. Husto kana. Husto kana.

<sup>217</sup> Dili sila taga-dinhi. Dili kamo taga-Arizona. Taga-California kamo. Husto. Ug usa ikaw ka ministro, ug ang imong pagpakigkauban mao ang sa Assemblies of God. Tinuod kana. Rev. McKeig ang imong ngalan, o, Rev. Keig, husto kana. Tinuod ba kana? Iwarawara ang imong mga kamot sama *niini*. Karon ang imong gamay'ng bata mamaayo na. Kita n'yo? Sa imong pagtoo!

<sup>218</sup> Karon unsa na? Karon kana mao ang tawo nga nagabayaw sa iyang mga kamot, wala siya makaila kanako, wala ako makaila kaniya. Apan unsa man kadto? Iyang gihikap ang Labaw'ng Sacerdote. Karon, kita n'yo, dili siya makasalig sa iyang kaugalingong salabutan. Karon unsa may iyang kinahanglan buhaton, unsa may iyang ginabuhat karon? Iyang kinahanglan toohan nga kon unsa may gisulti kaniya, mao'y kamatuoran, tungod kay nahibalo siya nga wala siya makaila kanako. Husto kana.

<sup>219</sup> Dinhi, ania nagalingkod nga usa ka babaye nga nagalingkod dinhi sa akong atubangan, usab, giduko ang iyang ulo. Nagaantus siya sa kanser. Gikan usab siya sa California. Nagahinaut ko nga dili kini niya mapakyas. Si Miss Adams. Mao kana ang iyang ngalan. Wala ko gayud siya makita sa tibuk kong kinabuhì. Oo, mao kana ang tinuod.

<sup>220</sup> Ania'y usa ka babaye nga nagalingkod mismo *dinhi* sa luyo. Dili ko lang maipatong ang akong, itudlo na lang ngadto kaniya, apan akong makita ang maong Kahayag nga anaa sa iyang ibabaw. Anaa siya sa tumang kahasol. Aduna siya'y kahasol sa iyang liog, sa usa ka butang. Ug ang usa pa ka butang, adunay iyang—iyang usa ka—usa ka espirituhanong kahasol, ang kabalaka nga mao'y iyang gikahasolan. Ug adunay kagubot sa iyang panimalay; ang iyang anak nga babaye bag-o lang milayas. Husto kana. Matuod kana, dili ba? Giisa niya ang iyang kamot. Si Mrs. Miller. Husto kana. Nagatoo ka ba? Paulion siya sa Dios, ayohon ang imong lawas. Karon, wala ko pa gayud siya makita sa akong kinabuhi. Siya usa ka bug-os nga dili ko kaila.

<sup>221</sup> Ania'y usa ka babaye nga nagalingkod *dinhi*, sa mga nanambong. Siya—siya dili taga *dinhi*, taga California usab siya. Anaa siya'y kanser, ug ang kanser anaa sa iyang suso. Naoperahan na siya sa usa ka suso, ug kini mibalhin sa pikas. Husto. Si Miss Calvin. Tinuod kana. Nagatoo ka ba nga ayohon ka sa Dios? Nagatoo ka ba niini. Ako dili mo igkaila, gining. Wala ako makaila kanimo. Mao kana'y tinu-od. Kita n'yo. Aduna siya'y kanser.

Aron nga inyong mahibaloan nga ania karon ang Dios!

<sup>222</sup> Adunay usa ka babaye nga nagalingkod sunod kaniya. Ang iyang ngalan mao si Mrs. Harris. Siya usa gayud ka dili ko igkaila. Apan sa dihang kining bayhana natandog sa Espiritu, siya usab nagaduyog sa pagbati uban kaniya. Ug siya nagagikan sa California. Husto kana. Ug aduna siya'y kahasol sa iyang abaga. Husto kana. Nagatoo ka ba nga ayohon ka sa Dios. Kung tinuod kana, iisa ang imong kamot aron makita sa katawhan; tuman nga dili igkaila.

<sup>223</sup> Ayaw pagsalig sa kaugalingon ninyong salabutan. Unsa may mabuhat niana? Dili mo masaysay kana. Usa kana ka daw-sinumpaki. Lagpas kini sa mahimong ikasaysay. Pangutan-a kanang mga tawhana; wala ko pa gayud sila makita sa tibuok kong kinabuhi, wala gayu'y nasayran bahin kanila. Mahimo kining magpadayon hangtud sa pagkahuman sa tigum.

<sup>224</sup> Apan, karon tan-awa, ayaw pagsalig sa kaugalingon ninyong salabutan. Kondili salig sa kung unsa may Iyang gisaad, nga Iyang pagabuhaton kana; kondili ba kana ang mao ra nga Espiritu nga nagapuyo diha sa tawhanong unod, nga nahibalo nga mikatawa si Sarah sa sulod sa balongbalong, sa luyo sa maong Tawo. Husto ba kana? Ug Siya nagsaad, sa wala pa sunoga ang kalibutan sa kalayo, sa dihang ang Anak sa tawo magapadayag sa Iyang Kaugalingon pag-usab sa samang pamaagi, sama sa—sa Anak sa tawo (nga mapropetahon) magapadayag sa Iyang Kaugalingon diha sa tawhanong unod sama nga Siya ania karon uban kanato niining gabhiona, sama sa Iyang gibuhat kaniadto. Karon unsa nang taknaa ang atong ginapuy-an? Haduol na gayud sa kalaglagan.

225 Higala, ayaw pagtindog dinhi, dili na, usa ka makasasala. Dawata si Jesus Cristo samtang ania pa kamo sa Iyang Presensiya. Karon, nasayod ako, nga kasagaran nabatasan na sa mga ministro ang panghangyo ug paghatag ug mga sugilanon, bahin sa inahan nga patay na ug wala na. Maayo man kana. Apan wala kita nagaduol diha sa basihanan ingon nga ang atong inahan patay na. Patay na ang akong inahan, usab; ang akong amahan, usab. Apan nagaduol kita, nga maalamon, nagadawat sumala sa basihanan sa Dios nga nagapadayag sa Iyang Kaugalingon diha kang Jesus Cristo, aron sa pagkuha sa mga sala sa kalibutan. Nagaduol kita ug nagatoo diha sa Panghimayad sa sala. Ug samtang Iyang napamatud-an ang Iyang Pulong . . .

226 Dili ko igsapayan kung unsang simbahana ang imo nang naadtoan, Methodist, Baptist, Katoliko, Presbyterian, o wala'y iglesia man lang. Kung imong angkonon nga imong nasabtan kini nga lahi, ug nasayod nga sukad wala ka pa gayud matawo pag-usab, apan gusto ka nga mahimo ka nga ingon, ug buot dawaton kini karon, ang maong saad karon. Tingali'g dili ka mapuno karon, apan mapuno ka gayud sa dihang . . . samtang ang tigum nagapadayon. Buot mong dawaton kini sumala nianang maong mga basihanan, mahimo ba nga motindog ka ug tugoti lang ako sa paghalad ug pag-ampo alang kanimo diha mismo kon diin ka nagatindog. Ang matag usa dinhi nga nasayod . . .

227 Ayaw pagsalig diha sa imong kaugalingon, bueno, moingon, "Nagsulti na ako sa laing mga dila." Karon, wala kana'y kalambigitan niini. Nagatoo man ako sa pagsulti sa laing mga dila, usab.

228 Apan nakakita na ako ug mga manlalamat, mga yawa, ug tanang uban pa, nagasulti ug laing mga dila ug nagahubad niini. Husto kana. Pangutan-a ang mga misyonaryo dinhi, atong masuta, si Igsoong Creech, ug nahibalo kamo nga husto kana. Nakakita na ko kanila nga nagsulti ug laing mga dila, ug nanginum ug dugo gikan sa kalabira sa tawo, motawag sa yawa. Sigurado. Nakita ko sila nga nagabutang ug lapis, ug motindog kini ug mosulat sa wala-maila nga mga pinulongan; ug ang maong manlalamat o balbal motindog didto, ginahubad kini.

229 Busa ang pagsulti sa laing mga dila dili mao'y timailhan nga nadawat mo ang Espiritu Santo. Kon ingon niana, ug kon nagasulti ka sa laing mga dila ug ginasalikway kining Pulong, aduna gyu'y sayup nga butang kon asa man. Husto. Uh-huh, husto. Ayaw pagsalig sa kaugalingon mong salabutan.

230 Adunay tawo karon, moingon ka, "Bueno, nakasinggit man ako niini." Mao man usab ako. Apan ayaw pagsalig diha niana.

231 Nakakita na ako sa nagkalainlaing matang sa mga gahum sa yawa nga nagasinggit ug nagasiyagit. Nakakita na ako'g mga

Mohammedanhon nga nagasinggit ug nagasiniyagit hangtud, mamahimo nila ang ilang kaugalingon ngadto sa usa ka kahintang, pagpalahus sa mga binuak sa ilang mga kamot. Sa India, nakita ko sila nga nagasinggit ug nagalukso-lukso, magdala ug mga bola sa tubig, nga may mga bingwit niini, ug ipadulot kini sa ilang panit ug molakaw diha sa ibabaw sa gabaga nga uling, husto, nagalimod kang Jesus Cristo.

<sup>232</sup> Kita n'yo, ayaw pagsalig sa kaugalingon mong salabutan, apan diha sa Pulong sa Dios. Kung ang imong kinabuhi dili nagasubay, niining Biblia, aron toohan ang matag Pulong nga anaa diha; ug buot mong toohan kini, ug buot nga ang Dios magapamuhat sa Iyang kabubot-on pinaagi kanimo, tungod kay mamahimo kang kabahin sa Dios, mahimo bang motindog ka ug moingon, "Ako nang dawaton kini karon mismo, igsoon." Salamat. Salamat. Ang Dios magapanalangin kanimo. Ang Dios magapanalangin kanimo. Ang Dios magapanalangin kanimo. Ang Dios magapanalangin kanimo. Ang Dios magapanalangin kanimo. Pagkamaanindot. Ang Dios magapanalangin kanimo. Hinaut nga ihatag sa Dios kaninyo, sa tanan niining mga matinud-anon. Moingon kamo... Pagpabilin lang—lamang sa pagtindog, lamang...

<sup>233</sup> Moingon ka, "Ako usa man ka miyembro sa simbahan, Igsoong Branham, apan sa tinud-anay usa ako ka Pentecostal; apan kung sa tinud-anay mahitungod na sa tinud-anay nga pag-ingon nga mahimo kong matoohan nianang tanang Pulong nga mao'y Kamatuoran, dili ko lang kini mahimo, apan akong—gusto kong buhaton kini. Tabangan mo ako, pag-ampo alang kanako. Gusto kong motindog ug moingon, "akong—akong..." Moingon ka, "Bueno, tan-awa, sa paglingkod dinhi, o nagpanghimatuod na ako niining iglesia, nga mao ako." Apan nasayod ka, sa sulod sa imong kasingkasing, dili ka mao. Ang Dios nasayod nga dili ka mao, usab, kita mo, busa nganong dili ka na lang motindog. Ayaw pagsalig sa kaugalingon mong salabutan, kondili salig sa Iyang Pulong.

<sup>234</sup> Mahimo ka bang motindog, uban pa? Anaa pa bay uban nga buot motindog? Ang Dios magapanalangin kanimo. Ang Dios magapanalangin kanimo. Ang Dios magapanalangin kanimo, kanimo. "Dios, tabangi ako." Ang Dios magapanalangin kaninyong tanan. Kana mao'y maayo. Pagpabilin lang sa pagtindog.

<sup>235</sup> Moingon pa, "Makahimo ba kana ug kaayohan kanako?" Pagtindog sa usa ka higayon, tan-awa kung makahimo ba gayud ug kaayohan kini. Pagmagmatinud-anon gayud niini, "Buot ko, Igsoong Branham, buot kong mamahimong matarung. Buot kong mamatarung."

<sup>236</sup> Karon, wala ako nagaingon nga biyaan ang imong simbahan. Wala, sir. Pagpabilin diha kung hain ka man, tinguhaa lang nga mamahimo kang usa ka tawong matuod nga napuno sa Espiritu

Santo nianang simbahana. Moingon ka, “Bueno, wala ako masayod kung unsay ikasulti sa akong pastor.” Iya kang dayegon kung mao ka, kung usa siya ka tawo sa Dios. Husto kana.

<sup>237</sup> “Pasigaa ang inyong kahayag sa atubangan sa mga tawo aron ilang makita ang inyong mga maayong buhat ug dayegon ang ilang Amahan.”

<sup>238</sup> Ang Dios magapanalangin kanimo. Bueno, ang Dios magapanalangin kaninyong duha, ug kanimo; ug kanimo, igsoon, kanimo. Ang Dios magapanalangin kaninyo, sa matag usa. Ang Dios magapanalangin kaninyo. Ang Dios magapanalangin kaninyo sa dapit dinhi.

<sup>239</sup> Karon kaninyo nga nagtindog, kung inyong ginabati nga nag-arang-arang na human sa pagtindog, itaas lang ang inyong mga kamot aron ipasabot sa uban nga inyong ginabati ang kaayohan niini human nga kamo mitindog. Kita n’yo, matag kamot. Sigurado, ginabati ninyo. Kita n’yo, matinud-anon kamo. Nagatindog kamo, nagasugid, “Ako mamahimo nang saksi.”

<sup>240</sup> “Siya nga magabarug alang Kanako dinhi, magabarug Ako alang kaniya didto. Kaniya nga gikaulaw Ako dinhi sa atubangan niining mga tawo, igakaulaw Ko siya sa atubangan sa Akong Amahan ug sa balaang mga Manulonda.” Ayaw Siya ikaulaw. Ayaw pagsalig sa kaugalingon mong pangaturangan. Salig diha sa Pulong sa Dios. “Siya nga moila Kanako sa atubangan sa mga tawo, ilhon Ko siya sa atubangan sa Akong Amahan ug sa balaang mga Manulonda.”

<sup>241</sup> Anaa pa bay uban, sa dili pa kita mag-ampo? Ato nang iduko ang atong mga ulo kon ingon-ana. Ang Dios magapanalangin kanimo, igsoong babaye. Sigurado. Ang Dios magapanalangin kanimo, ug kanimo, igsoong lalaki. Sa sigurado. Mamahimong anaa pay usa, samtang nga nakaduko ang atong mga ulo? Ang Dios magapanalangin kanimo, kanimo. Karon, husto kana, nga nagatindog kamo sa gihapon. Magpaabot lang kita sa makadiyut, sa makadiyut lang. Ang Dios magapanalangin kanimo, igsoong lalaki. Ang Dios magapanalangin kanimo. Moingon, “Nagkahulogan ba kini sa bisan unsang butang, sa pag-ingon, ‘ang Dios magapanalangin kanimo?’” Kana mao ang pagpahayag sa akong pagpanalangin kaninyo. Ang Dios magapanalangin kaninyo.

<sup>242</sup> Sa pipila kaninyo nga nagatindog daplin sa bongbong, diin wala na’y luna nga kalingkuran, mahimo bang ibayaw lang ninyo ang inyong kamot, nagaingon, “Ako, Dios, ako kini”? Ang Dios magapanalangin kanimo, igsoong lalaki. Ang Dios magapanalangin kanimo, ug kanimo; ug kanimo igsoong babaye; ug kanimo, akong igsoong lalaki; ug kanimo, akong igsoong babaye.

<sup>243</sup> Oh, ang Espiritu Santo sa katam-is nagalihok sa ibabaw sa mga mananambong. Mabati ba ninyo Kana? Ang Dios

magapanalangin kanimo, batan-ong lalake nga ania sa entablado. Ang Dios magapanalangin kaninyo, kadtong atua sa suok. Ang Dios magapanalangin kanimo, usa ka batan-on. Oo.

<sup>244</sup> O Espiritu Santo, sa kapiskay paglihok sa among mga kasingkasing karon. Ipakita kanamo ang among mga sayup, Ginoo. Wala kami . . . Dili kami mosalig sa among kaugalingong salabutan, sa among kaugalingong pangatarungan. Kondili nagasalig kami diha Kanimo, tungod kay nasayod kami nga nagatindog kami diha sa Imong Balaanong, gipamatud-ang saad karon. Imong gihimong dayag ang Imong Kaugalingon labaw pa sa bisan unsa, labaw pa sa bisan unsang pangatarungan. Dili kami makapangatarungan ni makasaysay niini. Apan mikanaug Ka mismo dinhi sa among taliwala karon, ug gipadayag kanamo nga ania Ka dinhi, ug ang mga kalalaken-an ug mga kababayen-an nagatoo niana ug ginadawat kini.

<sup>245</sup> Dios, dad-a ang matag usa kanila sa Imong sabakan, ug itago sila diha sa maong Bato sa Kapanahonan hangtud nga ang kalayo milabay na. Nagapaingon na kami sa pagkasunog, Ginoo. Nasayod kami niini. Nahibalik na kami sa Sodoma. “Apan ang mga matarung dili mangalaglag uban sa mga sad-an.” Imong pagatawgon ang Imong mga anak, Ginoo. Imong gisultihan si Lot, “Panggawas gikan diha. Gawas.” Ako nagaampo, Dios, nga ang matag usa nga anaa nianang kahimtang niining gabhiona, nga atua didto, wala nakasigurado kung asa sila nagatindog. . .

<sup>246</sup> Dios, dili sila modawat sa pamasin nga nagalakaw sa usa ka dulungan nga dalan, sa sayup nga dalan. Dili sila modawat sa pamasin nga nagadagan diha sa sugang pula, kung anaa sila sa ilang hustong pangisip, tungod kay mahimong mamatay sila. Nan unsaon man sa pagpamasin sa tawo sa ilang Pang-wala’y Katapusan nga padulnganan, sa pagpanaghap lamang, paningali, panimpalad nga wala na man gayud panugot sa pagpanimpalad, tungod kay nahisakop man sila sa usa ka simbahan o usa ka denominasyon? Ug sa pagkatinuod dili nila mahimo, dili sila makasabot kon giunsa nga ang Pulong sa Dios mahimong mahitabo karon nga sama niini kaniadto, kon unsaon niining mga saad mamahimong dayag. “Ang apostolikanhong panahon tali tapos na.” Tabangi sila, Amahan. Ako silang ginatugyan Kanimo sa Ngalan ni Jesus Cristo. Amen.

<sup>247</sup> Salamat, akong igsoong lalaki, igsoong babaye. Malipayon ako kaayo nga tawgon kamo nga akong igsoong lalaki, igsoong babaye.

<sup>248</sup> Hinumdumi, patubagon ako sa Dios sa matag pulong, sa Adlaw sa Paghukom. Sa matag butang nga akong giwali niining gabhiona, kinahanglan kong manubag niini. Nasayod ako niana. Ug unsa may akong nabuhat sukad sa akong pagkabata, nagwali niining Maayong Balita, ug unya mahimong sinalikway?

<sup>249</sup> Karon pipila man kaninyo ang masakiton ug nag-antus, dinhi niining gabhiona, ug buot ninyong maampoan? Itaas ang inyong kamot. Karon mahimo bang buhaton ninyo ang usa pa ka butang alang kanako? Ipondong ang inyong mga kamot sa usa'g-usa. Ipondong ang inyong mga kamot ngadto sa usa'g-usa. Ang matag-usa iduko na ang inyong ulo karon, ug sama lang nga anaa ka sa simbahan, dinhi dapit sa entablado.

<sup>250</sup> Minahal nga Dios, sa Ngalan ni Jesus Cristo, ug sa Iyang Presensya, usa ka gipamatud-ang Presensya! Ang maong Pulong mismo nga gikawali, nahipamatud-an na nga Ikaw mao sa gihapon kagahapon, karon, ug hangtud sa kahangturan. Tugoti nga ang Espiritu Santo sa Dios molukop niining panon sa katawhan karon. Daghan kanila ang nangdoul ug midawat Kanimo ingon nga ilang Manluluwas, daghan nga mga namaliksa-pagpakasala ang midawat Kanimo ug nangbalik. O Dios, akong ginaampo nga sa Ngalan ni Jesus Cristo, nga ayohon Mo ang matag tawo. Ikaw nag-ingon, "Kining mga ilhanan maganunot kanila nga nagatoo; kung ilang ipandong ang ilang mga kamot sa masakiton, sila mangaayo." Gisaad Mo kini, Ginoo, ug ang maong matinoohong mga anak anaa ang ilang mga kamot nahipandong sa usa'g-usa.

<sup>251</sup> Satanas, naparut ka na. Gumula ka niining mga katawhan, sa Ngalan ni Jesus Cristo. Buhii silang mga tawo, alang ngadto sa Gingharian sa Dios, sa Ngalan ni Jesus. Amen.

<sup>252</sup> Sa tanan nga nagatoo nga si Jesus Cristo mao na ang inyong mananambal karon, ingon usab nga inyong Manluluwas, ug buot ninyong dawaton Siya sa niining mao rang sukaranan, pagtindog, pag-ingon, "Ako nang ginadawat karon si Jesus ingon nga akong mananambal, ingon usab nga akong Manluluwas." Pagkamaanindot! Dalaygon ang Ginoo! Pasalamat ang Ginoo! Karon atong ibayaw ang atong mga kamot ug mag-awit ngadto Kaniya.

I will praise Him, I will praise Him,  
Praise the Lamb for sinners slain;  
Give Him glory, all ye people,  
For His Blood has washed away each stain.

<sup>253</sup> Oh, Wala ba kamo nagabati ug maayo? Iwarawara ang inyong mga kamot. Oh, sus! Atong awiton kini pag-usab.

I will praise Him, I will praise Him,  
Praise the Lamb for . . . (Hinumdumi, "mao ra sa gihapon kagahapon, karon ug hangtud sa kahangturan," kanang maong Kordero.)  
Give Him glory, all ye people,  
For His Blood has washed away each stain.

<sup>254</sup> Nagustohan ba ninyo kana? [Nagasinggit ang kongregasyon, "Aleluya!"—Ed.] Amen. Itunol nato ug makiglamano kang bisan kinsa. Kini mao na ang pag-undang sa tigum, pagsugod

sa konbensiyon. Ingna, “Ang Dios magapanalangin kanimo, igsoong, magpapanaw. Ang Dios magapanalangin kanimo.” Maayo kaayo kana. Maayo kana. Pagkamaanindot! Karon nagatoo ba kamo nga magkaaduna kita’y usa ka ka maayo kaayong konbensiyon human niini? [“Amen.”] Nagapasalamat kita sa Dios tungod sa usa ka maayo kaayong tigum, karon magkaaduna na kita’y maayo kaayong konbensiyon. Ang tanan nga nagatoo niini, moingon, “Amen.” [“Amen.”]


My faith looks up to Thee,  
 Thou Lamb (molantaw kita Kaniya karon) of  
 Calvary,  
 O Saviour Divine;  
 Now hear me while I pray,  
 Take all my sin away,  
 O let me from this day  
 Be wholly Thine!  
 While life’s dark maze I tread,  
 And griefs around me spread,  
 Be Thou my Guide;  
 Bid darkness turn to day,  
 Wipe sorrow’s fears away,  
 O let me from this day  
 Be wholly Thine!

<sup>255</sup> Amen! Ang kongregasyon miingon, “Amen.” [Ang kongregasyon nagaingon, “Amen.”—Ed.] Aleluya!

Oh, Dayegon Siya,  
 Dayegon ang Cordero nga gipatay alang sa mga  
 makasasala;  
 Ihatag Kaniya ang himaya, kamong mga  
 katawhan,  
 Kay ang Iyang Dugo mao’y naghugas sa matag  
 buling.

Daw sa Pagkamaanindot!

<sup>256</sup> Sige, ato nang iduko ang atong mga ulo karon alang sa panalangin. Wala ako mahibalo kung kinsay gipili sa pagbuhat niini. Si Igsoong Johnny Manadal, nga taga-California, samtang atong ginaduko ang atong mga ulo. Karon ayaw’g kalimot ugma sa gabii, mao kana ang nahauna, ang pagsugod. Ugma sa gabii, ang konbensiyon maania mismo dinhi, mismo niining maong lawak-tigumanan, sa alas siete y media.

<sup>257</sup> Ang Dios magapanalangin kaninyo. Nalipay ba kamo sa Presensya sa Dios? [Ang kongregasyon nagaingon, “Amen.”—Ed.] Amen. Karon atong iduko ang atong ulo samtang si Igsoong Johnny magpauli na kanato. 



*AYAW PAGSALIG SA IMONG KAUGALINGONG SALABUTAN* CEB65-0120  
(Lean Not Unto Thy Own Understanding)

Kining Mensahe ni Igsoong William Marrion Branham, una giwali sa Ingles niadtong Miyerkules sa gabii, Enero 20, 1965, alang sa Full Gospel Business Men's Fellowship International sa Ramada Inn sa Phoenix, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2009 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)